

萬曆武功錄

廣東

巢賊賴元爵藍一清諸酋列傳

螺螄酋長以什數。賴元爵最大。馬公酋長以什數。藍一清最大。洋烏酋長以什數。刁世興最大。大坪酋長以什數。陳世通最大。掩桑酋長以什數。鄒嘉儒最大。此皆有許朝綱。溫希政。鄧坤五。鄧坤七。宋徵。曾永興。盧伯能。宋貴仁。葉惟茂。廖清。葉景祥。賴文清。賴元禎。戴之槌。李志東。丘青山。爲之羽翼也。而又有高潭。高潭酋長以什數。馬祖昌最大。赤花酋長以什數。馬祖盛最大。藍溪酋長以什數。黃民泰最大。鮪溪酋長以

什數。黃貴最大。東坑酋長以什數。李仲山最大。高砂  
酋長以什數。廖和尚最大。石坑酋長以什數。陳旗最  
大。九了酋長以什數。曾廷鳳最大。黃捕酋長以什數。  
曹志良最大。烏石酋長以什數。楊崖最大。爛田酋長  
以什數。曾文端最大。葫蘆酋長以什數。曾萬璋最大。  
捕尾酋長以什數。黃明時最大。八萬酋長以什數。謝  
福最大。陂烏酋長以什數。曹勝最大。麻竹酋長以什  
數。王栗江最大。碗窰酋長以什數。葉景清最大。油步  
酋長以什數。丘萬頃最大。半埔酋長以什數。鄒愛清  
最大。銅坑酋長以什數。曾仕龍最大。洋口酋長以什

數。肅宗最大石門酋長以什數。廖一統最。大溪沙酋長以什數。磨石懷最大。而以童阿禿爲南哨。倪敬夫爲海哨。余松峰爲中哨。至和平烏虎鎮。則又有徐仁器酋。諸略酋。徐譚酋。黃承沐酋。皆賴元爵。藍一清等所分據。此皆惠潮阻山橫行者也。前是嘉靖中西長伍端溫七。黃世喬。蘇繼相等。後先犯惠潮。上使大將軍數興兵擊破之。其後上卽位。念惠潮久勞苦軍旅。有詔減今年租稅。予貧民。亾何。和平人何友益。長樂人顏天週。海豐人葉宗德。歸善人姚鏞。皆後先伏關。奏賴元爵諸酋罪。於是下本兵譚綸問狀。

幸賜制置使殷正茂往正之。制置使既乘傳到官。惠潮諸生三老盡負弩矢。蛇行出國門數十里。遠者數百里皆匍伏道左。並跪起。悲號動天地。制置使下車。進諸生三老前。問狀。諸生三老皆嗚咽失聲。不能對。廼以所繪圖陳前。圖賴元爵藍一清。延袤八百餘里。盤牙四十八巢。一切皆流血丹地。二酋提劍揮鼓。晝夜騎馬好出劫。所過道上行人皆敷躬巾。體有焚斃死者。有溺水死者。有隕絕崖谷間而死者。戰戰慄慄。唯恐逢二酋。二酋至。或剝面斃腦。甚者殺至舉宗。白骨塞道。鬼神皆爲夜哭。而二酋志氣揚揚。剖孕婦。

以視胎。粥嬰兒以飼馬。烹兒。必使母燃火。殺父。必使子旁觀。創囊戶而貫胸。斷手足以爲環。二酋皆以爲笑樂。大自愉快也。制置使覽觀繪圖。悽然傷懷者良久。於是竊跡前事。請數自隆慶初至辛酉末。圍寨凡二百餘所。殺虜凡千萬餘人。而其最者。二年入長埔圍。殺盧伯茂等二百五十人。虜三百餘人。又入康公圍。殺陳吉卿等二百餘人。虜二百餘人。入大魚池圍。殺吳元卿等三百餘人。虜二百餘人。其三年春入馬屎岡圍。殺翁廷珊等二百餘人。虜一百八十餘人。其四年夏入塩路際圍。殺黃本光等二百餘人。虜二百

餘人。其十一月入牛橋圍。殺袁理等二百餘人。虜諸生劉澤輝及男婦三百餘人。其十二月入栢田村。殺陳子富等三百餘人。虜五百餘人。其五年春二月入鵝埠嶺。殺劉五等二百餘人。虜三百餘人。其八月入大埔屯。殺董思明等三百餘人。虜三百餘人。其四月入小瀝圍。殺五百餘人。把總徐天麟斬葉亞三等首九十六級。其六月入孔子門。逃至三坑。撫民葉景清行捕。斬謝十一等首十五級。其十一月入上下淮都至白沙仔圍。殺朱朝邦等一百七十餘人。大入水東至青塘天罡。又入長樂至船坑鐵場。入龍川至羅洋。

李田入通衢至田心入寬仁至上村復入鵝埠殺略葉元等而去其十二月入船澳圍殺黃復陽等二百餘人虜三百餘人是時嶺東曾廷鳳曾萬璋已遣子入學而嶺西陳金鶯羅紹清譚權伯亦皆衿甲面縛就湯鑊於是馬祖昌等畏威歸降主計者可之獨給中張楚城以爲許降非是大略謂初伍端黃世喬發難時率聚黨不至數千人假令當事者旋即撲滅何如有後日乎今曾廷鳳江漢王栗江葉景清馬祖昌等請歸降皆詐也於是一意以征討爲務矣而制置使廼與直指使楊一桂決策卽召布政使張子弘叅



政使魏文煥按察使江一麟副使劉穩李渭陳復升王璽僉事使何子明李材趙可懷諸察都指揮侯繼高大會庭中卽以赤白囊請兵餉時金錢在閩者得四萬在省會者得留鹽鐵贓罰事例大率八萬七千六百兩於是屬同知周宗武陳學麟毛爲光轉穀軍中熊曉及通判胡誠何志實龔修推官章如鉦祠兵然後徵左右江土兵凡二萬人而以叅議使顧養謙爲監軍軍歸善叅政使陳奎爲監軍軍長樂副使吳一介爲監軍軍永安是歲隆慶壬申也期以十二月初二日出師前是冬月末副觀察使蘇愚微使通判

胡誠守備使徐天麟出擊。生獲酋長鄒嘉儒、賴文清、宋徵等二十六人。俘獲三人。奪馬牛羊四頭。被鹵一人。其初二日遊擊王瑞引裨將葛子明進攻冷陽峒。先登破之。斬首五十一級。俘獲二百二十五人。奪牛馬六十八頭。沈思學許成攻馬公寨。卻敵先登。斬首二十三級。俘獲六人。黃道追逐至蕉坑。生得彭一生等一十三人。樓子和直搗螺溪巢。時酋長賴元爵已亾。抵象窖大山矣。而養謙及通判徐師稷指揮王之野諸生張邦聘追亾逐北至磨刀埔。鏖左坑戰象窖。斬首四十四級。俘獲四十七人。被鹵四人。奪獲馬七

騎器械三十有四。其初四日。把總許成。包潮。樓子和。張仲椿。帥指揮汪克振。土吏黃恩隆。提兵至張田。卻敵。斬陳容等首五十七級。俘獲四十二人。奪獲馬牛一百一十五頭。恩隆又與指揮黃卷。疏捕南嶺。斬首一十四級。俘獲生口三人。其初八日。總兵楊佳復。引兵攻馬公寨。擊螺溪。直抵西坑。磨刀埔。斬首一十四級。俘獲二十五人。奪馬八蹄。吏目黃道。獲殺賊四百四十五人。奪被虜七十五人。其初九日。皇華使張可大。以一軍軍螺溪。後山天麟。以一軍軍大梧山。斬首七級。俘獲二十八口。奪獲牛馬五十有二。許成以一

軍軍萬峯。漏裏村。搏戰。斬王阿三等首六十五級。俘獲十六口。奪牛二頭。其十一日。總兵張元勲。叅政唐九德。引遊擊王瑞。及徐天麟兵。追至南嶺。鏖戰。斬首四百一十級。俘獲九十七人。奪獲牛馬二十八頭。器械三十有二。叅將沈思學。引許成。張仲椿兵。乘勝逐北。斬首二百七十一級。指揮祖萬松。引把總王之臣兵。斬首一百八十九級。俘獲十八口。奪牛馬牛九頭。知縣陳中立。引鄉兵捕伏。生得李和等七人。叅政使陳奎。引叅將李誠立兵。還攻大溪峯。老巢。擊大安山。斬首二百二十級。俘獲二百。有五人。奪獲牛馬並

百九十頭。器仗一百一十有餘。其十二日。復引兵疏捕南嶺。還攻萬峯山。斬薛萬寶等首四十六級。俘獲四十九人。奪獲牛四頭。器仗十條。王瑞及徐天麟追亾逐北。至柘口橫峯山。斬首四十五級。俘獲四十二人。招獲鍾時明。劉大倉等二百五十一人。裨將楊桂及典史王策引兵疏捕陳田鴈山。斬鍾一道等首四十三級。俘獲二人。其十七日。叅將李誠立引把總張禮兵攻葫蘆峯。斬首捕虜二百一十三級。俘獲二百二十人。奪牛畜器械皆以百數。殺賊皆犇走三溪巔。生老巢。其十八日。誠立即懸千金。曰。能衝鋒斬級者。

有如此賞。於是把總張禮等。卻敵先登。斬首獲虜六百級。焚死牛畜無數。酋長賴元爵。馬祖昌等。皆奔走爛田葫蘆山。旦日日出。叅政使唐九德。引沈思學許成兵。擊破之。許成斬首二級。把總駱彥珊。執酋長曾文端。僇之行捕。斬首一百五十級。俘獲六十餘口。餘復奔走烏石巢。其明日。還攻烏石巢。生獲酋長楊崖王亞三等五十一人。斬王栗江等首五百級。餘復走土城。我兵乘風縱火。凡燒死五百餘人。畜產亾筭。是日。誠立復引兵。擊鷹嘴嶺。閩羅磴破之。生得酋長廖和尚。斬首一百五十四級。俘獲一百五十一人。餘奔

走倪敬夫巢其二十四日思學及許成鷄鳴而駕追逐至八萬峒埔尾平明與酋長黃明時挑戰衝鋒斬首一百五十級它皆潰圍走我兵乘勝復追亡數日生得黃明時及其妻兒子三人是時鮎溪酋長饒明峰已死而以黃貴行事於是有蕭達李仲山馬祖昌陳旗羣輩爲黨鼎足而立而叅政使陳奎燕知諸酋以除夕度我兵必不至皆飲酒醉曉睡誠立即引兵直擣其巢擊破之生獲黃貴蕭達陳旗等斬首二百餘級俘獲二百人當是時曹志良李東山卓子望亦聚黨千餘人阻黃埔巢以爲險而九丫酋長曾廷鳳

復遷施坑大山矣。於是裨將錢作禮。詳爲招諭。以肅  
虛實。而總戎卽自陳田。一日夜單騎馳至。叅議使顧  
養謙所。議因引兵擊破李坑。生得志良。東山子望等  
九人。時壬申冬盡也。其明年月正元日。養謙冒險深  
入賊巢。賊巢出其衆挑戰。自日出至日晡。數十合。遊  
擊王瑞守備徐天麟斬首三百四十八級。俘獲二百  
有二人。奪畜產三十九頭。器仗三十有四。把總樓子  
和。駱彥珊斬首三百二十餘級。奪器械五十有五。裨  
將楊桂斬首一百八十四級。俘獲三十二人。奪獲器  
械二十。黃道斬首二十九級。俘獲一百一十四人。叅



將王詔指揮王之野斬首捕虜一百級俘獲三十五人。守備陳璘斬首二百餘級俘獲七十二人。奪獲馬五頭指揮祖萬松斬首二百四十九級俘獲八十六人。縣尉舒揚及把總胡玉斬酋長李志東等首七十四級俘獲十三人。餘黨皆散奔。於是王瑞徐天麟引兵疏捕黃埔官塘李坑諸山。生獲酋長賴元禎聶蘭馨等斬首一百一十七級俘獲二十五人。招獲七十一人。奪牛畜四角。萬松復斬首一百一十八級俘獲九十一人。其初五日許成生得酋長馬祖昌。其初六日陳奎及李誠立追逐上護內洋師溪諸山破之。生

獲酋長李仲山。馬祖盛。蕭宗。吳子球。斬首二百一十  
二級。俘獲二百一十餘人。把總蔡賢。斬酋長童阿禿。  
劉子謙等首二十九級。俘獲三十一人。其初八日。許  
成。及駱彥珊。進攻石門。破之。斬首捕虜三百五十級。  
指揮劉椿。攻甲子。所破之。斬溫希政等首五十一級。  
復攻畚坑。破之。生得酋長曾萬璋。而州判林士瑛。生  
得酋長鄧坤五。鄧坤七。把總鄭子龍。斬首捕虜五十  
一級。其十八日。袁謙及副使吳一介。總戎張元勳。攻  
烏禽嶂。破之。把總樓子和。斬首一百級。王瑞。斬首  
虜五十二級。把總何仕。孟津等。斬首七十九級。俘獲

四十四人。奪牛馬三頭。王之野。生得酋長曾廷鳳等  
十三人。斬首四十級。俘獲十三人。陳璘。斬首四十三  
級。俘獲七十五人。奪獲牛馬四十四頭。祖萬松。斬首  
四十五級。俘獲五十七人。指揮高勛。生獲六人。黃道  
楊桂。斬首二百二十一級。俘獲七十二人。餘黨復奔  
八萬峒。其十九日。把總張鳳。及許成。追亡逐北。斬首  
一百二十級。巡檢宋福。生獲童仕通等三十六人。餘  
黨皆買舟入于海。行至冷飯坑。我兵戰逐。斬廖一統  
等首七十七級。俘獲三十九人。於是叅政唐九德。及  
鄭子龍。跡至大安峒。生得酋長許成綱。曾永興。盧伯

能等二十八人。樓子和至磨刀埔。斬首捕虜三十級。其二十日復出百金。使使者劉朝習。群降賊黨。具知賴元爵所。是夜引兵至和尚巖。會大風雨。揚砂礫蔽面。元爵方出巖。取草木。治蓋藏。而劉朝習卽就道左。禽元爵。及宋貴仁。葉惟茂。廖清。葉貴祥五人。陳璘復攻烏禽嶂。生得酋長戴之槌。斬首四十七級。其二十二日。追亡至弔鬼嶂。斬首捕虜三十一級。其明日招獲黃元興等十九人。其明日行捕至三坑。生得酋長丘青山。斬首二十五級。是時潮州諸賊亦聚黨二千餘人。奔惠來。阻林樟以爲險。於是陳奎及李誠立懸。

千金以鼓將士。將士乘勝轉鬪。勇氣益百倍。乃與諸流賊快戰。斬首一千三百餘級。俘獲一千餘人。時二月朔也。其初五日。把總陳應星引兵搜五作諸山。破之。生得酋長倪敬夫。斬首一百級。俘獲五十人。把總陳子紹巡檢陳德懋。徐思忠。攻碗窰。逕石榴潭。破之。生獲酋長羅浮山等五十一人。俘獲七人。李誠立。及把總楊君維。攻陂烏八萬峒。破之。生獲酋長謝福。曹勝先。斬首一百六十餘級。俘獲二十人。復引兵搜疊石。西山溝。生得酋長詹石懷。劉忠。斬首十級。德懋。思忠。復攻赤泥山。破之。斬洪大有。林一鴻等首十五級。

太學朱選攻岐壁林破之斬首二級把總黃應龍攻  
內洋山破之斬陳阿孫等首八級俘獲二人招獲張  
瑞等三人李誠立疏捕斬首八十三級徐天麟攻九  
丫樹破之斬首三十八級俘獲四人縣尉張應洙及  
巡檢林仕奇攻象鼻山破之生獲一人奪獲水牛貳  
角俘獲三人餘黨復奔藍溪黃民泰巢於是王瑞徐  
天麟引東蘭南丹諸狼兵擊破之王瑞斬葉鳳等首  
二百三十六級俘獲九十二人奪獲牛馬二十七頭  
器械三十有八徐天麟斬首八十五級俘獲三十一  
人奪獲牛馬十頭餘黨盡散亡把總何仕追逐至

青村嶂斬首五十六級。俘獲十二人。林仕奇斬首四級。俘獲二人。生獲黃民泰男黃陳豆一人。其初九日。天麟追亡逐北。至長埔。生得酋長張受凱。復追至仙溪苦竹凹。生得酋長黃民泰。斬首三十二級。林仕奇鏖戰。生獲二人。天麟復引兵追逐。斬首四十五級。王瑞斬首五十八級。主簿劉焯斬賴維綱首二十級。俘獲五十一人。其十三日。張元勲及顧養謙、吳一介、訶知酋長曾仕龍阻高山橫行。於是擊鮮太會賓客。以示不戰已。黃道及祖萬松忽治兵擊破之。生得酋長曾仕龍。斬首一百四十七級。陳璘斬首一百四十七

級。王之野斬首一百二十七級。楊桂斬首一百二十  
六級。把總馬華斬首二十一級。其十八日。副使蘇愚  
及王瑞。徐天麟。攻茅山嶂。破之。生獲酋長鄒萬頃。鄒  
愛清。斬首九十三級。俘獲四十四人。通判徐師稷及  
皇華使朱昂。疏捕諸山。斬首十級。諸生葉春秀。招獲  
四百七十人。陳璘追亡逐北。斬首一十七級。祖萬松  
斬首二十三級。俘獲五十四人。朱昂亦追逐至秋溪。  
斬首九十九級。楊桂追逐至水潭。斬首八十七級。招  
獲五百二十六人。其二十四日。同知周宗武。引把總  
黃縉雲。樓子和等。疏捕碗窠諸山。斬首六十級。其二



十八日。指揮李如桂。生得酋長葉景清等五人。司桓生得六人。諸生張邦聘。生得二人。朱昂生得一人。先是都給事中張楚誠上書。請先正藍賴二酋罪。諸酋有款塞歸降者。聽於是。潮州人黃瑞。劉興策。請曰。累臣有死罪。當釁鼓。唯將軍幸寬假以死。得比編氓。不復有它腸。違令。請族矣。自是後酋長魯宗惟。刁世興。後先來降。顧養謙議從之。賊黨解散。獨和平烏虎鎮。地接南贛。其酋長徐仁器。徐譚。諸略。黃承沐。楊文達等。陽降陰叛。皆反覆不可測。於是縣令陳文彬。鄒斬仁器等五人。而以李仁爵等十餘人。檻車傳致軍門。

也。當是時。廣州守胡心得。惠州守樂舜賓。潮州守李多祚。及歸善令劉尙志。海陽令馮笏。河源令林大輔。長寧令陳立中。長樂令艾鰲。龍川令尹良任。興寧令俞嘉言。程鄉令武尙耕。揭陽令林大經。潮陽令黃一龍。博羅令吳日強。順德令胡友信。東莞令董裕。增城令王良心。番禺令沈思孝。南海令陳贊。皆能積功勞。佐軍興。於是制置使使者黃映乾。以大捷聞。故事。使者奏捷。賞賜視首級爲差。御史紀嶺東首虜。實一萬二千有級。本兵題以牒移儀部。請。爲府頒衣一襲。俟。御前宣捷。給使者。如令。於是保章氏推。

擇四月二十五日辰時吉。是日大鴻臚致詞。引使者至御前奉宣捷音。公卿以下率吉服。五拜三叩頭。頌陛下威武恩及牛馬。上乃詔曰。積歲山賊盪平。各官勞績可嘉。殷正茂忠實任事。勲庸尤著。乃賜正茂右都御史。廕一子副千戶。張元勲都督同知。廕一子百戶。皆官執金吾。世世勿絕。賜正茂金四十兩。飛魚紵絲衣一襲。元勲及南贛都御史李棠。金三十兩。紵絲二表裏。賜左布政使方弘靜金錢幣帛亦如之。吳一介。賜秩二等。唐九德等。賜秩一等。李誠立。賜副總兵秩行叅將事。沈思學。王瑞。賜實秩一等。賜王

詔陞秩致仕。皆予二十金。紵絲一表裏。徐天麟等。張子弘等。賜金二十兩。王化等。賜金十五兩。李文續等。胡心得等。賜金十兩。周宗武等。賜金五兩。上重念本兵譚綸調度籌畫有功。賜金四十兩。紵絲麒麟衣一襲。所司郎中亦賜金十兩。它皆五兩。御史楊一桂。賜金二十兩。紵絲二表裏。是役也。西粵得論功者。叅議使則李文續。叅政使則張岳。副使則沈子木。僉事使則霍與瑕。夏道南。叅將則王世科。錢鳳翔。其後嶺東殘寇又亂。

嶺東殘寇。在惠有大溪峯酋。東坑酋。石坑酋。許山酋。

穿隴背酋。碗窰酋。小溪酋。高砂酋。內洋酋。在潮有林  
樟酋。五作山酋。砂溪酋。雙派酋。青南溪酋。粗石坑酋。  
大坑巖酋。天坑陂酋。烏大坪酋。烏坑酋。龍潭酋。山川  
皆廣潤。林木茂深。諸殺賊於是得奉頭鼠竄其中矣。  
始班師時。都御史殷正茂已意料其下。爲逋逃淵藪。  
也。於是出兵餉金凡五千兩。轉惠潮。而以郡守爲主  
將。縣令爲分哨。曰。而以便宜行事。卽下令。斬首一級  
者。予一金。是時狼兵及土兵皆掣旋盡矣。乃引十二  
營營兵。䟽捕惠潮諸逋賊。諸逋賊果聚黨千餘人。專  
以殺略爲務。潛出則攻人不備。橫行則拒敵官兵。曾

未班師二三月。而麾蓋復儼然辱臨矣。乃使叅將沈思學。李誠立。王瑞。統督之。遊擊徐天麟。吏目黃道。分督之。而以總戎張元勲爲大將軍。屬副使顧養謙。陳烈。叅政使蘇愚。實式臨之。期九月初六日。治兵。於是徐天麟由長樂攻其北。陳璘由沙田攻其東。黃道由牛牯遙攻其西。張仲椿由海豐攻其南。魚麟雜遶四面而至。諸逋賊時有出者。罕而希矣。其初十日。黃道次員潭。鏖戰。斬首捕虜一百二十七級。餘黨皆逐逃。沙田及白馬大山。其十四日。沈思學引偏將陳璘。祖萬松。追亡至新村。何木輿。斬首一百三十一級。我兵

亡二人傷十人。其十八日總戎及偏將王瑞、楊桂、張九韶追逐至張田、萬峯、南嶺，斬首長閭羅王等三十五級。胡鑰復引兵攻沙田、白馬、大山，斬首虜九級。鄧子龍攻令洋、小荊諸山，斬首十級。劉椿生得吳仕才等二人。董龍逐北至烏禽嶂、黃峒、黃埔諸山，斬首捕虜一十四級。徐天麟追逐至洋頭、楓樹嶂、北溪、藍溪諸山，斬首二十四級，生獲陳盛等三人。是時斬捕雖多乎。然制置使恐後徑實廣，未易叩周遍，乃令郡守邑長躬詣諸山巢，大索數十日，得根株窟穴所在，諸逋賊無噍類矣。自是後，張元勳及楊桂、張玘、疏捕南

嶺李坑黃埔先登。生得江巫等二十八人。斬首一十四級。葛浩搜赤溪漏小荊諸山。邵敵先登。生獲王應高等五十二人。斬首一十九級。沈思學。鄧子龍搜捕小荊大山。邵敵斬首二級。駱彥珊疏上阜員。邵敵斬首六級。復搜獅子嶂洋口。先登。生得劉大忠等三人。斬首一級。劉椿攻圍子寨。先登。斬首三級。胡鑰復引兵疏捕東坑。邵敵先登。斬首五級。獲生口一人。張仲椿。黃讓疏中溪。邵敵斬首十級。沈世元疏惠來。邵敵先登。斬首六級。伯效恭搜驢子耳。先登。斬首七級。徐天麟疏松坑。先登。斬首虜六級。還搜捕烏坭山黃竹。



坑卻敵先登斬首一十五級追亡至陳坑斬首虜一十一級復搜白溪小溪諸山先登得生口一十六人斬首四十三級搜掩桑尾先登斬首六級陳璘郭天虎疏捕橫坑白馬碗窰諸山先登斬首三十五級祖萬松疏新田尾烏禽嶂先登斬首捕虜二十七級黃以敷柯應經搜章田卻敵先登生獲陳茂等九人王詔搜牛牯逕先登生得袁亞十一人沈愚學張仲椿復引兵搜小溪山卻敵斬袁亞二等二人搜新田山得生口一人斬首一級關汝正疏捕陂坑先登得生口一人陳萬潮生得葉亞三一人李夢秋搜上下黃

砂。卻敵生得葉尚仁。黃可有等四人。胡誠生得鄧秉  
秀。黃亞子。蕭招男等十人。斬首四級。沈世元。張仲椿。  
疏東坑。先登。斬首六級。蔣魁。廖道南。搜捕密洲嶂山。  
先登。斬首二級。蔣魁復與魏建寅。搜栢埔烏泥。藍溪。  
先登。生得劉彥等四人。劉椿。追亡至赤竹逕。得生口  
二人。楊桂。葛浩。包潮。搜蓮子嶂。卻敵。得生口一十七  
人。斬首虜一十一級。張獻文。魏建寅。搜羊牯寨。卻敵。  
共連首虜四級。海豐兵搜小溪山。先登。生得沈志  
道等一十三人。斬首一級。復搜獅子嶂。平岡。先登。生  
得丘厚重。曾仲孫等十人。斬首三級。長樂兵搜大梧。

山卻敵先登生得鄒滿子等九人斬首八級復搜麻竹嶂先登生得張天命等四人斬首一十一級龍川兵斬首捕虜二級永安兵搜捕鳳凰岡先登得生口三人復䟽捕得陳萬祿劉應奇等十一人河源兵䟽車田先登生得黃積珠等七人興寧兵搜羊稠觀音諸山卻敵生得黃仁孫等八人是歲萬曆登西冬盡也先是都給事中李已上書言輯軍士知險隘禁殺降將軍乃令有歸降者聽於是祖萬松招獲一十六人黃清招獲羅亞孫宋國等一十五人鄧子龍招獲三人由此大將軍益令明經及太學諸生深入不

毛曉譬諸酋以大誼曰。陛下神明公卿幸出石畫  
多中。譬若等若口中蠱耳。若等無妄舉妄舉族矣。於  
是大學姚柯任大順及明經譚士寅。詣碧甲。得黃一  
清。唐孔喬。黎子忠等八十人。海豐得男子諸廷寶等  
一百五十人。婦女一十七人。復詣內外管油坑白馬  
諸山。得何子成等三十三人。諸生譚君厚。得黃景亮  
等十人。把總李夢秋。得黃亞三一人。廖道南。得謝邦  
立等四人。蔡志魁。得周水保。羅應元等十二人。鄉民  
朱世權。得彭施綱等九人。是日並席藁。請曰。願將軍  
哀憐吾等小人。妄愚無知。奸將軍旂鼓。今誠洗心易

慮幸赦其辜戾而賜入圖籍得比編戶民唯將軍死  
生之於是諸降民以其半歸農它皆入籍爲兵頃太  
將軍上功莫府斬首捕虜及招獲凡一千三百有八  
人奪獲凡五百三十有三入器械凡六百二十有八  
自是以來嶺東肅靖民頗得安其田里桴鼓不復晝  
鳴矣其後六月有言者請推勘嶺東事大略謂督撫  
諸臣浸以習誣欺漫成風虛詐眩實於是正茂請乞  
賜骸骨以避賢者路上乃詔曰廣地自來多盜殷  
正茂當事以來已皆漸次盪平功積顯著其餘殘賊  
尚假以便宜令其相機除勦豈宜過爲苛責使人不

得展布其能。且課功覈實。朝廷自有明典。亦非人臣所能欺罔。乃令正茂益張法紀。毋以浮忌。自生退沮。致隳前功。大哉王言。不獨大將軍善于將人。陛下真善于將將者矣。

讚曰

語曰。侯王將相。寧有種乎。余始以爲戲語耳。及觀嶺東事。多成自縣令。丞尉及太學。明經。然後信有文事者。必有武備也。然哉。漢高帝。因夫獵。追殺獸者。狗也。而發縱指示獸處者。人也。此可不謂善論功乎。卒之高鳥盡。良弓藏。何也。願將軍觀古名將。履盛滿。勉之。

哉

鮑時秀列傳

鮑時秀者龍川撫民也別號鷄毛白嘉靖中常劫略河源歸善博羅諸縣執通判洪章主簿陳濬索金錢於是卿大夫士庶皆出橐中裝贖之由此益慄桀居恒與妻杜嘆曰大丈夫欲王則王安能鬱鬱久居人下乎乃阻義都猴嶺爲巢大招致四方亡命至數千人日夜獨與葉應祚崔惟屏輩習演禽觀天書妻杜猶攻妖術能走沙石擊人面時秀見面貌被擊者輒自媮快以爲奇曰阿杜真吾妻也於是叩視天而俯竄地遽妄欲王東粵廼立陶瑤房伯祿王茂等爲三



十四方大總。因自稱無敵洞王。出入擁大蓋。策駟馬。橫行郡邑。白晝大都中。桴鼓晝鳴。唯恐秀倉卒至。至輒殺人。畧財物。甚者縱火。焚燒室廬。秀尤好華宮室。廣田園。旁義都田宅。秀盡奪爲己有。於是義都烏徙而去者。固已什七八矣。義都歲輸秋糧二千八百餘斛。縣官每徵輸。必問諸通邑。通邑被其禍十三年于今乎。萬曆初。龍川殷文宇等伏闕下。訟秀罪。下總督侍郎殷正茂問狀。會諸良寶藍一清。賴元爵等。後先伏殿刃死。於是秀佯爲請撫。以故得解免也。居七八年庚辰。秀不忍殺慘之性。輒復叛。乃聚黨數百人。

專出劫。往來河源張溪間。會殷相往藍口佃耕。秀道  
逢相。卽劒斬之。鹵鄒老子等九人而去。復乘大風。縱  
火焚燒其屋居。於是龍川人殷高。沙大成。走告制置  
使監察使願。請斧鉞殲厥鮑酋。庶吾等小人得保首  
領。幸甚。明年秋九月。制置使劉堯誨。梅淳。以狀聞。  
遣將軍擊破之。斬首捕虜凡三百四十九人。俘獲凡  
五百五十九人。馬牛凡二百四十五頭。故事。論功行  
賞。唯丞若簿尉以下。聽制置使專決。它一切皆從中  
制也。於是本兵方逢時等。案莫府上總戎臣黃應忠。  
叅議臣劉倬。副使臣張堯年。叅將臣季金。遊擊臣葉

歡守備臣陳居仁知府臣李天倫臣張敷潛通判臣  
陳舜咨毆陽守推官臣唐之儒臣陳應熙知縣臣林  
庭植臣林民止臣王思宗都護臣祖萬松指揮臣戴  
恩錫臣牛思弼把總臣王燮臣朱子龍臣姜虎等功  
次前是薊遼制置使梁夢龍奏捷上有詔詔各  
邊奏捷皆先議賞賚其陞座必待案覆於是賜  
劉堯誨三十金紵絲四表裏遷黃應甲秩二等季金  
秩一等金錢幣帛皆有差賜劉倬張堯年十五金林  
庭植等各十金陳舜咨等各五金諸臣既受賞皆叩  
頭誦陛下聖神威武幸宜暢輿東矣

譏曰

一日縱敵數世之患此言寇不可翫也鮑時秀如故撫民耳當其面縛請降豈自知有今日偃然侯王擅置大總殆崛疆矣哉語曰養虎貽患此言雖小可以喻大也

六灣諸山賊列傳

六灣者高要所部屬也。乙亥春酋長鄧勝龍及王三坑陽春富林諸巢謀劫六灣殺人如艾草菅於是制置使殷正茂以羽檄徵裨將梁守愚陳璘往問之期以六月初六日並發。亡何璘軍逗遛不至賊皆遁逃走璘竟殺已降貪爲功其後頃之給事中裴應章案正茂劾奏梁守愚陳璘狀以請大畧謂六灣之捷踞第言新興恩平王三坑及陽春富林諸巢賊耳殊不言多寡竊恐賊徒黨多。多沉匿不以報則是可疑一也。踞既云殺死男婦及焚燒輿輜去。大率凡一百

一十四人追獲七十二人。則計所焚殺僅四十餘人。後乃云六灣之慘。有不忍言。則是可疑二也。疏既云。璘軍密擣富林。斬首凡一百五級。俘獲凡五十一人。牛五十角。馬十六蹄。何後又云。璘卽未奏功。猶不失爲勇乎。則是可疑三也。事下兵部問狀。於是守愚坐法免。始制置使凌雲翼新到官。鄧勝龍通以其徒黨四百餘人。乘上元夜半。城中燈火相望。人徒股股接踵于道。諸巡徼皆解嚴。勝龍窺城中之隙。由此犯新會古墨坑等地。於是僭兵使石磐令裨將肇慶陳璘以旦日樓頭鼓發鷄鳴。直走山後。捕伏。鏖勝龍。勝龍

方披甲躍馬前。衝鋒我師皆疾力。戰勝龍身被十餘  
創。生獲旋物故。斬首捕虜凡一百七十人。奪獲畜產  
亾筭。前是鄧勝龍馮目蘭黃癸卯三人者。皆一體阻  
山公行。龍不祿。旣伏誅。兩人於是重足一跡。曰。漢主  
有神。遂遂遁入深山死。

讚曰

余過東西粵之墟。墟中人曰。余鄉獠浪以數十百數  
而王坑富林特山巢此。不過獠獠。殆什一二耳。說者  
皆曰。往昔嘗以招撫誘賊。賊益自貴倨。余以爲不然。  
天方令獠獠雜兩粵。兩粵雖得衛霍。曷勝誅乎。

岑岡江月照列傳

江月照者。岑岡酋長李文彪壻也。正德中。彪父鑑常與濁溪謝仁恕相扇而起。亡何。新建伯王守仁大擊破。溺頭於。是。岑岡濁溪皆請降而和平。由此復爲縣矣。是後。文彪與上陵酋長葉九琳下陵酋長張仕澄部二十四甲。亡慮千餘人。嘉靖中。彪益縱九琳仕澄輩出略熱水。我師常大徵江閩兵征之。弗克。當是時。內有濁溪謝仁恕之酋。外有高沙謝允樟之酋。下歷賴清規之酋。盤牙連歲結爲婚姻。有司莫能問。而會惠州知府顧言。草爲檄曉譬之。彪乃使其弟文彩執



黃世輶葉宗劉仁來獻諸偷盡解散隆慶初江月照  
爲政會年穀不登廼與允樟擊破下歷徐仁標因聚  
黨四千人走汶龍佛子凹聲欲犯南雄北山直擣湖  
廣雷家峒於是撫巡使李佑請兵往正之照等懼  
乃率其酋長黃讓而樟亦率其姪謝朝選標亦率其  
舅彭朝憲並請於贛州知府黃宸由此得爲撫民其  
後上之丙戌照乃使其壻葉英復出劫殺道上諸  
賈人而和平知縣陳源湛使使者逮捕英英行至中  
道照追使者奪英誘使者詳言英新物故令知使者  
所言詐也復傳逮英繫獄照廼欲反於是撫民余德

傳等恐事覺將連染請徙入城。照聞怒乃殺余德仲。蕭乙秀等數人傳具以其事訟於制置使吳文華。屬分守使吳顯問狀。照復懼誅。廼聚黨六百餘人。擊牛酒爲盟。遂反。當是時。定南方下令募兵勇。照佯言阿巢治甲兵。列隊伍爲往定南。故示監門弗疑。尋復與酋長李珍、李佩、吳通盟。於是分守使使簿尉丘大懋、劉貴招照。照不從。廼恃中洞、張丫山、貓頭嶺、大水山、上下山爲門戶。澹坊上下度爲輔臂。而以姪江永寧及繼男李佩主之。旦莫徜徉其中。自謂得金湯。良足恃。漢兵烏柰我何也。居亾何源。湛以爲漢兵儉卒難。

征莫若用以夷攻夷法。廼使使者招中洞酋長黃廷  
俊降。俊降。皆它可接踵至。尋上下山大水山及濬坊  
上陵酋長黃仕球等。果後先請降。源湛廼大喜曰。自  
是照可禽矣。是日即使仕球。廷俊。捕照。果獲照。及其  
子江樑。綵長幹江招。子江朱衮。照乃飲鴆死。綵等皆  
繫獄。是時照黨李珍。江月明。江永清。款塞願歸降。而  
珍所部賴元。王聰。廖仕懷等。二十餘人。最號慄桀。源  
湛恐珍請盟詐也。廼使仕球。葉大周。吳玉珊往。元因  
詒言欲與球共執珍。球弗信。元曰。請盟可乎。球乃赴  
盟。元竟殺球等。遂遂逃走。我撫兵行捕。斬黃子厚等。

首九級。當是時李佩、李龍號爲千餘衆矣。乃由左援出南埠，往赤硃嶺，過太保，乘風縱火焚何宿深巢，略賴益超而去。去龍南上蒙保，南坑冷水逕楊村止舍。於是南韶備兵使葛文卿因郵置以告，定龍之間蕭然苦兵矣。先是球捕照照妻劉及其媳王李義婦巫乃奉頭鼠竄於定南，定南屬江以西虔州也。尉胡尚倫捕繫劉等及繼男李佩、長幹葉大圓。是夜劉縊死獄中，而撫巡使賈待問已行至泰和。於是嶺北分守使容若玉分巡使丁應詔廼請于撫巡使秦耀耀初到官，即使叅將胡大忠及朱冠提賴營兵備二南於

是移兩廣制置使。大會。往正佩等罪。而惠潮分巡使盧仲佃。及分守使吳顯。先已提肇慶兵。分爲二軍矣。當是時。佃以一軍。軍長樂。顯以一軍。軍龍川。而守備使阮維藩。游擊洪夢鯉。指揮朱桓。並五合六聚而至。縣西北行三十里。至熱水。經洲頭。黃狗凹。龍子嶺。上峯。在坂凹。入巢。可七十里。又有熱水。五花嶂。陳坑。入巢。可三十里。東北行三十里。至水車頭。又十里。至山高阱。入巢。水車頭一道。至鴉子塘。十里。又二十里。至上陵。一道。至桃樹灣。又十里。至下陵。皆大道。從縣間行三十里。至楊峒。十里。至龍塘。入巢。又由龍川。行二

日半。至石林。又行一日。至烏虎鎮。經長塘。徐萬貴巢。自烏虎鎮。由上坪峰。過何世清巢。至飲放逕。趨下陵。可四十里。入巢。又由上坪峰下逕。趨上陵。可三十里。入巢。又由閃石逕。至三壇。可二十里。入黃明琥。葉文益巢。又由眼胡逕。至上陵。可十里。我軍期十道並入。於是酋長李珍、黃清、陳受恩等畏威。乃使諸偷楊鑒、衿甲面縛。詣定南。請曰。殺賈人者。實余德。傅謝明、葉英。其後復殺葉大周者。實黃以高。李文、李歐、眼、江福。與珍等不相及。願賜哀憐。得寬假。不至死。而縣令沙道初。令乃珍以檻車膠致。一高等制府。餘諸將與安。

定。旦日珍等乃走和平洲頭。已又由螺湖至南埭。畏  
兵衛甚設。復走赤硃嶺。間道抵東牌。殺寨兵葉招美  
等四人而去。於是監察使喻文偉及江西撫巡使陳  
有年。監察使朱鴻謨皆以狀請。事下兵部。會侍郎  
石星本兵柄。復於上有詔。詔制置使相機會剿。是  
後叅將洪夢鯉提兵從間道追。必逐北。斬首一百三  
十四級。諸酋復還左拔。我兵行捕。斬首二十六級。追  
逐至陳坑。斬首二十六級。復䟽捕梅子山。斬首二十  
五級。俘獲李佩、黃清、陳受恩等四十人。諸偷稱賊臣  
而請附編氓者。凡一千五百五十餘人。我兵僅亡三

人傷四十餘人。鴻謨既生得諸酋，卽訊，適當黃清李佩等十四人梟斬和平市，而以陳受恩、葉子政等十五人適邊，張化等三十一人徙塞外。葉長仔等五人給功臣爲奴。法如是。尚書王一鵠並以請於上，詔以三人給定國公，二人給臨淮侯。是後，賜秦耀爵一級，及陳有年、金二十，表裏二。史繼辰等金十兩，葉明元等金五兩。明年夏，監察使蔡夢說復上吳文華、吳顥及惠州知府黃時雨、同知鄭天佐、王懋中功，因劾奏總戎劉鳳翔、惠州判賴岳夔、夔坐法免。賜吳文華以下金錢有差。始逮繫黃清等四十人，皆瘦。



死獄中。而江樑綵、黃寶、袁亥、孫曾庚生四人幸獨存。又皆四三歲。禮悼與耄刑不及。前是嘉靖中。都御史應槓奏俘獲二十歲以下。其情有可矜者。得減死。適湖閩江浙諸衛。而未受室者。卽所獲婦配之。著爲令。於是夢說請比。得釋。綵等廼緩湏。史母死。

讚曰

和平之峒。獨稱岑岡。濁溪。利頭乎。新建伯乃犁。利頭而郡縣之。何其緯武也。江月照。幸伏誅。濁溪謝仁恕。豈獨得存哉。乃說者曰。惠之民難治。在盜賊。余以爲不然。郡有礦。顧太守言常言開。賊盜熾。閉則盜息。良

是由此觀之。礦不可不封矣。蓋惠之禍府也。

山賊陳金燕建寧人紹清列傳

陳金鶯。嶺西酋也。紹清。嶺南酋也。是時林翠蘭。馮月明。譚樵伯等皆響而起。朋黨增。由此往來高肇。廣諸郡。恩陽會寧。高興。南寧。殺人如艾草。菅甚至擊海期所。還攻蓮塘。廣海衛。殺我指揮費大經。場官賈朝宣。皆被金夷而死。大將軍提赤白囊。一日十餘上。棚車。鍛矢。馳行乎兩嶺之間。兩酋則先已守險。西恩平諸村。南馬騶。懷寧。苦村。諸巢爲餌。以故我擊其西則遁南。我擊其南則遁西。縣道莫能禽。隆慶末。殷正茂爲制置使。張元勳爲總戎。而合叅政魏文煥守嶺西。

僉事李材備嶺西王化備惠州何子明備廣州許孚  
遠備嶺北諸察備南韶副使李渭巡潮州劉穩巡海  
道皆有風望廼相與謀曰疆場之事惟一彼一此故  
鮮成功今盜賊公負旁若乎無疆吏吾等有如共僂  
力善守界則視滅此屬殆猶口中蟲耳於是偏下令  
縣道期殄滅賊久之山徭海浪諸賊並起也而懷寧  
苦村藤峒狗逕牛牯突酋長林翠蘭蘇松黃高飛爲  
五甚於是帥德慶徭犯滿口過息村寨自戶王雲龍  
追北至大峒破之斬首二級徭兵王公斬穿耳徭一  
級磨刀山徭犯開建邑令胡希寅擊破之斬首七級

生得從賊一人。傷一十七人。鄉夫李朝寵。鏖戰斬陳  
第倫一人。犯小江黃泥涌。遊擊王瑞破之。斬獍首七  
級。俘獲四人。奪獲舟三十二艘。牛六頭。還禽盤大仔。  
獲器仗三十有奇。大羅山獍犯廣寧。督兵黃紫蘭擊  
破之。斬龔子榮等首五級。犯瀧水石牌岡。尉賀西追  
北至木拱橋。斬首四級。獍兵廖公年。及督兵鍾聲。鏖  
戰斬陳亞二等首三級。生獲孟朝隆等一十六人。俘  
獲一人。奪獲二人。牛八頭。餘賊盡逐逃。而陽江諸生  
吳日仕。千戶黃廷臣。商人魏大卿。逢賊於望牛岡。千  
夫長黃文錦。鷹擊破之。生得張惟愛等一十九人。賊

益聚黨千餘人。入肇慶破殺橫江諸村也。於是知府  
黎桂乃發指揮何伯堂、高明典史張正夫、裨將鄧正  
慶戰破之。斬首一十四級，奪獲馬一騎。追北布茅村。  
斬首十四級，奪獲馬二十騎，牛九頭，男婦五人。感恩  
知縣羅善行至恩平，茶禾峒逢賊一百餘人。大子羅  
琚疾力戰破之。斬首八級，生得吳一洪一人，鹵獲器  
械一十有二，男婦一十七人，牛二頭。分守使魏文掖  
亦行部至恩平中火那龍道，逢賊把總吳廣從攻山  
岡破之。斬首三級，得生口五人，俘獲女子一口，把總  
陳克敬擊牛牯突破之，焚其巢百餘。斬首二十七級。

生獲周三十等三人。奪獲男婦一十五人。馬二十三頭。攻官來逕。與風門凹。狗牙水。破之。生得諸仕奇。楊成。吳亞二。黎從仔。斬首二級。遂散於會陽廣開之間。乍合乍離。盛矣。縣道起而擊者四面。於是山賊千餘入四會石村。把總吳坤。破之。追亾至黃板寨。斬首四級。奪獲男婦三十人。馬四騎。還攻青塘營。破之。斬首一級。俘獲躑躅葉。景達二人。奪獲三十七人。陽江千夫長。趙國璽。鏖戰。斬徐涯德。茹符等首二十三級。生得林天奇。張唐養等四人。攻狗逕巢。破之。斬李二仔等首四十級。生得范亞長等十人。奪獲三人。牛四頭。平。

地寨酋長陳經起而發難也。總戎梁守愚擊破之。捕獲何貴等四十人。俘獲男婦三十八人。奪獲器仗一百六十有奇。牛一十八頭。賊入封川獨木村。縣尉陳養滂破之。斬首捕虜二人。高明典史張正擊赤麻逕還攻冷峒村。破之。斬首五級。生獲李赤子等二人。於是恩陽會寧百姓馮公器等二百餘人請於備兵使林林。廼一意以馬騶懷寧。苔村九逕。藤峒十三村爲務。副總戎梁守愚廼獻策。必先示以招撫。然後從容論勸。久之。遊擊王瑞提水兵入自赤水口。守愚提陸兵入自白蒙。逕諸賊皆自恃寨戶蓬茅險阻。漢兵莫



能入。一旦水陸並進。如自天而下。皆徒手裸身奉頭鼠竄。我師銳炮盡鳴。乘風縱火。焚蓬茅。破之。斬林翠蘭。李天仔。蘇茂松。戚碧潭。杜勝奇。馮月明。丁龍泉。侯惟貞。李業勝等首三百七十五級。生得譚權伯。羅紹清。伍弘誨。二人。俘獲男婦三百八十二人。奪獲男婦一百一十七人。牛馬一十一頭。器仗三百八十有奇。諸賊愈遁逃。而肇慶倖曾璋。部索斬首一百五十級。俘獲四十三人。奪獲器仗七十有奇。把總吳維藩。帥獠兵。跡且至丁髻巢。大索觀子。覩頭大河。破之。斬梁朝綱等首三十二級。招主鄒文茂。追亡至大湓村。以

計擒陳金鶯。獲輿膠致軍門。把總鎮安屯吳坤。生得徐允松等九人。斬首一十級。俘獲男婦一十六人。把總烏菱塘。胡玉錦。生得林梅賢等五人。斬獲一十七人。俘獲三人。把總黃竹凹。曾表。生獲馮亞遲等二人。斬首凡三十七級。俘獲三人。把總白蒙遲方燧。生得張亞燼等八人。斬首三級。俘獲男婦二口。守把官來遲黃元功。生得曾惟一等五人。斬首一級。守把懷寧馮公器。斬首凡一十級。是時偷長藍一清。亦倔起惠州而黃列江群輩。犯歸善諸郡。分巡使王化。帥把總徐天麟。擊傑村。破之。同知周宗武。通判徐師稷。推官

郭駘擊黃坭逕破之。還擊泚子逕。長塘大破之。叅將  
沈思學擊潭頭。下樟橋圍。復攻冷水山。虎逕。陽化圍。  
破之。斬首凡三百二十五級。奪獲凡五百二十人。於  
是山賊犯梅隴岡。叅將沈思學追北至高沙。破之。斬  
首七級。黎清鏐於陳田。賊徒二百餘人。走長橋。追上  
生獲丘圍一人。斬首三級。洋烏潭賊犯小瀝圍。惠州  
知府樂舜賓馳大浦。直擣洋烏潭。破之。復攻高埔子  
洋尾。大破之。斬首凡九十七級。俘獲一十七人。奪獲  
器仗一十有奇。復攻高埔。撫民葉景清鏐戰於三坑。  
破之。生獲謝十一。斬首凡一十一級。奪獲七人。犯木

綿岡把總鄧子龍破之斬首凡一十一級奪獲虜四十一人海賊林鳳犯扁涌圍把總張正魁擊破之斬首凡二十二級奪獲器仗三十有奇犯東莞黃旂角同知毛爲光破之斬劉達文等首七級生得吳邦秀等九人俘獲張亞二等七十六人犯香山平藍村至潭州邏卒黃登破之生得何汝奇等二十七人奪獲舟一艘器仗一百有奇犯三水五頂都邏使破之俘獲莫亞古李亞英等一十一人山賊犯新寧姓峒蘇坑至三瀝沙過坭埔都斛朗尾村縣令姚文煒帥邏卒伍峯破之斬林長保等首九級把總王學禮典史

王澍至二城村還過滂泊篋埋山。歷龍村後山。銅鼓山。大破之。斬林亞長、黃飛鷹等首七十八級。生得藍祖仔、鍾喬等九人。奪獲男婦一百有奇。牛七頭。器仗一百三十有奇。於是僉事何子明見爲藤峒九逕沙田、湖塘、白石十巢於廣州。其前則爲咽喉。其後爲背也。而總戎張元勳分爲二軍。一軍出老榕逕。一軍出澈水逕。而把總王學禮、鄧子龍亦分爲二軍。一軍出松栢堡。一軍出城岡堡。諸偷畏我兵盛。弗能當。并皆走。鬼山、甘檣、笠帽山、廣州於是乎無賊患矣。當是時。許俊美在西海。林鳳在靖海。兩海廼獨不得高枕卧。

乎。而僉事許孚遠提把總石子方王道成兵直擣仙  
門港大破之。斬首四百餘級。奪獲賊舟三十餘艘。男  
婦二百二十人。而會大風從西北起。蕩舟樓船卒弗  
可戰。俊美遂欲犯東海。調羅村裨將何天衢破之。斬  
首四級。復奔沙頭洋。我軍衝鋒擊破之。沉賊舟四艘。  
生得二人。斬首六十七級。俘獲三人。俊美竟遂逃。而  
林鳳廼乘隙專欲殺略村落。而兵巡使李渭使把總  
楊愷捕伏於赤澳。破之。斬首三十級。得生口八人。指  
揮劉椿鏖戰甲子所。追亾至海尾。大破之。斬首二級。  
擊殺四十餘人。唐老李希與張總殘賊犯陽江。澄邁

脩州而把總吳天賞帥撫兵許謙擊破之生得李希  
吳三等五十四人奪男婦八人叅將白翰紀轉戰於  
龍岐生得陳四等二十四人奪男婦九人叅將王詔  
追亾逐北至佛堂門斬王二等首一十七級奪男婦  
八人先是酋長諸秀洪廖廷璧錢孔恩公行藍武懷  
集之間而英德人陳益朋黃瑜後先復闕下請弓

矢往正其罪會它務倥偬未皇也孔恩見山海諸倫  
旣殄滅恐禍且及已廼聚黨欲爲諸倫報前日之役  
於是僉事諸察帥新民黃天葵等挑戰黃塘洲生得  
孔恩檻車傳軍門渠魁乃盡殲除矣而軍峒賊犯荷

木峒連山尉蔣在樵千戶管仁度追逐至石坪腦破  
之斬首五級揭陽賊犯曲溪塞守備陳璘疾力戰破  
之斬首四十一級奪男婦一百二十人是時三軍樂  
大征不樂鵬勦以大征得錄功故也而未知嘉靖中  
應本兵已請爲令令截殺鵬勦南方蠻賊一人自  
捕斬五人以上者止遷秩一等六人以上亦如之賞  
官軍有能捕斬三百人以上遷秩亦如之賞不制置  
使殷正茂以令甲正告三軍三軍勇氣益百倍斬首  
捕虜凡二千四百六十八級奪獲男婦凡一千三百  
六十七人制置使於是上書言截殺與鵬勦視大



征有六難五善。語在奏疏。廼請比嘉靖中鎮遠侯顧  
寰及叅政張謐。僉事茅坤。提兵截殺柵鼓山。鵬勦陽  
朔縣。莊頭兒子巢功。上廼賜殷正茂金三十兩。表  
裏二張。元勳等金二十兩。表裏一。梁守愚及魏文煥  
等金十兩。時隆慶壬申冬也。始三巢蕩平時。十三村  
男婦皆矜甲面縛。請歸降。而獨陳金鶯慄悍。於是新  
民梁喬陳友忠受分守使徵計。因約金鶯至黃泥潭  
起壩。壩以初開無所得。金鶯必欲米去。計不就。俄頃  
梁總戎自恩平還。蘇文茂廼皆金鶯郊迎。金鶯卽帥  
蒼頭軍二十餘人負矢石。並至員山太廟。請誓而後

行是時烏斐頭白蒙逕兵威甚設喬廼告梁富遂縛金鶯以獻也

讚曰

余聞之應本兵曰截殺鵬勦爲最難而得功最真大征則濫矣殷公以爲誠然陳金鶯廼與島夷相扇而起也假令必大征而後就縛烏得盡滅乎余觀諸路守巡使皆大才筭無遺策始自相期許各以成功秦曰賴陛下之靈山平海晏良然余一念及則未嘗不欲被之管絃也

山海黃高暉許俊美列傳

黃高暉。山賊也。許俊美。海賊也。暉別名高飛。前是酋長丘勝富。黃朝富等阻藤峒。九逕諸巢爲險。常偕陳金鶯擊破蓮塘廣海衛。久之。金鶯伏誅。高暉得亡抵故巢。壬申冬。總戎張元勳追亡逐北至藤峒。大破之。生獲丘勝富。諸可行。黃朝富。陳雲梯。黃允盛等八十有二人。俘獲男婦一百一十五人。而備兵使何子明。譙讓邏使益急。於是守備謝潮把總鄧子龍。帥新寧典史王澍。搜捕斬李環溪。諸汝才等首一百八十七級。生得暉妻李。及其大子黃梅仔。子龍還搜猿峒。五

指山。生得高暉等一十餘人。把總王學禮搜其遮山。斬首三級。生得黃飛鷹及其妻若子六人。俘獲三人。而是時瀧水陽春間諸逆寇亦時時竊發也。乃有若苗長李惟能犯二都六營。而瀧水主簿謝斗起卽以羽檄徵平塘兵及把總杜昭嚴亮所部浙兵直擣林峒。巨大破之。斬首捕虜一十二級。奪獲男婦二十八人。把總陳良璣行部至雲霄。鵝埠間逢浪賊追逐至陽春梅峒。笊山鷹擊破之。斬首五級。生得陳亞仔。陳日華等六人。奪獲男婦三十三人。牛馬七頭。了碧山賊。過牛韞巢。把總吳廣追北破之。斬首三級。奪獲二

人犯茶山省祭羅琚破之斬首一級奪獲一人牛一頭浪賊犯太平圍備兵使李材叅將梁守愚破之斬首二十餘級生得李翠峰蔡惟喜奪獲男婦三十餘人牛馬一百頭乃乘勝縱火焚賊巢凡三十餘所糗糧凡數千石諸偷於是遂梅峒旦日出不意蹙我兵我兵殊疾力戰大破之斬首捕虜一百餘級許俊美乃亦乘是時發難乎俊美者林容所部也隆慶中常與吳平起海島我橫海將軍黑孟陽部索竟未獲久之一旦詣高州願以功請贖而白鴿白沙兵殊不欲曰咄猾虜乃詐降計在欲緩我大兵耳趣挑戰一戰

而挫其鋒。復追逐至雷州望鷄山。過廣海鯉魚塘。後先逢大風。擊舟。舟多沉。弗可救。俊美廼得走馬頭。背白蕉。於是登山矣。俄厓門。甜水坑。蛋民告海道使劉穩。吳一介所。曰。許酋殺畧我。願爲我畫便計。而海道使卽以檄調順德。新會。香山。東莞。商漁船兵。四面攻。俊美廼鼓而出。香山大洋。因爲僞招木牌。詞甚諄逆。不幸遺亡在道。上新會兵收得之。請於制置使。廼屬叅將白翰紀。治漕船。簡黃頭郎。令叅將晏繼芳提兵以往。當是時。海賊鄭大漢。張朝。皆有名於時。竄海上之隙。相扇而起。於是漢犯瓊海。朝犯甲子碣石之間。

韓紀廼陳兵虎跳門而會諸倫私相攻擊廼殺俊美  
及其妻。因以屍棄水中。我海上兵乘勝轉鬪。勇氣益  
百倍。生獲馬世福。林貫。蔡亞通等七十三人。而晏繼  
芳亦獲捷於三憲洋。斬首三級。生得四十四人。擊破  
賊舟。赴水溺死四百餘人。殺賊皆犇牛角灣。把總吳  
天賞追亾至三洲洋破之。斬首三十六級。生得諸應  
承。余有孫。李三等三十六人。俘獲男婦三十七人。撫  
民許謙。從賞及金丹。還搜荔枝灣。斬首六十五級。生  
得七人。還過樓肚灣。調酋長鄭大漢。久爲海上勞苦。  
我兵部索不可得。於是謙與天賞爲一軍。軍高觀峒。

丹與姚允恭爲一軍。軍石笋峒。漢果與兩徃群輩爲  
姦。破之。生得大漢等三十餘人。斬首一百餘級。俘獲  
男婦七人。是時撫民林道乾亦提桴鼓踵軍門。上謁。  
願盡力。而會海賊張朝偉起。道乾擊破舟一十餘艘。  
斬首二百餘級。自是之後。山賊鍾月泉等復出。七娘  
灘爲營。而分守使顧養謙帥守備陳璘破之。斬首二  
十八級。奪獲男婦二百有六人。牛馬二十一頭。叅將  
沈思學鏖戰破之。斬首一十八級。山海諸殺賊搜捕  
殆盡。卽時有竊發者。罕而希矣。始俊美崛起海島也。  
伏波將軍圖之不得。是時陳世貫有籌策。廼告天賞。



曰。我佯爲畔漢。趨白鰲。抵於美。將軍幸垂拱而觀其成也。於是以十月朔日去。果與所知交。陳大老破殺進美也。

讚曰

余觀惠潮之所爲撫民。新民。尙民。皆尙賊也。廼用以破諸尙。奇哉。高暉俊美。崛起山海間。睥睨一世。卒死于間者之手。要之陳世貫善間矣。故曰。明君賢將。能以上智爲間者。必成大功。孫子豈欺我哉。

林道乾諸良寶林鳳列傳

林道乾者澄海人也嘉靖末常公行南海上專以剽略爲務。何偕諸良寶來歸降。聚黨三千人。得食膏腴田千餘畝。隆慶中橫海將軍郭成常調乾及莫應敷征曾一本。乾劔斬辛繼。新老來獻。於是軍中之事悉以咨乾矣。乾爲人有風望。智力無二。好割據一方。自雄。所至輒不忍貪。淫之性掘人墳墓。淫人妻小。蠶食人田土。常擅山海之禁。以爲利。里中皆畏乾。莫敢有後言。後言唯恐乾使使者偵伺。聞必怒。寧拍棄田產。無寧值乾怒矣。乾自謂不能居人下。居恒欲收招

海上精兵發動舉事於是四方亡命並亡抵乾乾乃  
深溝高壘日夜以絲綿爲甲治戰艦使使者飛芻輓  
粟至海上乾於是志在海島矣制置使殷正茂佯寬  
假乾罪曰令而得以功贖於是乘傳以惠州陰使叅  
政使劉穩唐九德按察副使吳一介蘇愚叅議使顧  
養謙及橫海將軍張元勳胡震議以不意圖之當  
是時乾有侄曰茂先在彭亨國爲都夷使廼以尺一  
牘約乾乾竟瞑目張膽請于叅政使陳奎曰極知制  
置使意業已遠託異域不復還矣往所給一十七劄  
今封還它一切寨衆請以屬林德亡何寨民許老等

殺德欲反。是歲癸酉二月十五也。乾旣行至其埔寨。廼出橐中裝五百金。帛五十純。因陽四送奉寨主。廼以乾屬把水使翁十。蘇老林十六等所部。而四亦得蒲履絺綌諸物。費亡慮千金。是時我伏波將軍提兵至北津港。生得乾軍師林俊夫。及其埔寨人亞馬必力等。具知狀。於是制置使以檄諭暹羅安南。令部索乾及賊老何鸞等。而安南都統使莫茂洽。即使使搜其埔寨。其埔寨廼真臘夷國也。使者言安南實無此寨。茂洽於是持斧行境上。捕獲偷盜廣東人吳成謝六。趙亞三等。福建人李高等。凡二十人。婦女凡十四。

口皆篋輿傳致制府曰臣國實無敢匿乾者有則具以告其後庚辰八月暹羅亦便使者握坤哪喇請予制置使劉堯誨曰乾今更名曰林浯梁所居在臣國海灣中專務剽略商賈聲欲會大泥國稱兵犯臣國臣國請招徠乾乾乃欲軟血爲盟誓誓無令漢使得執我也於是臣國不得已佯與乾盟今乾已行至頭關敢聞是時香山灣人吳章佛郎機人沉馬囉咪及船主囉鳴衝吹吡通事蔡興全等二十餘人並踵制府上謁請自治裝往擊乾於是制置使進暹羅使者庭中間狀因賞賜銀牌花彩段如禮曰與我師並

華如令。先是戊寅七月。乾自甘埔還潮故巢。居月餘。發曩所藏銀穴。募潮一百餘人。與俱南行。至瓊崖。遇閩中轉穀舢舨。乾乃略其金銀。及男婦二百人而去。初乾在東埔。用楊四計策。乞寨主發唐兵一百人。番兵二千人。舢舨二十大。銅銃一門。令陳國順並攻暹羅。不克還。暹羅探不及。是時與我師夾攻擊。腰斬乾。廼令得復入國。要盟城下。君子於是謂暹羅無勇矣。而會麻城耿廷向。爲閩撫巡使。知乾已復奔暹羅。乃使使者陳漢昇陳廷案。往東埔寨。爲乾瓜牙楊四所訶。得微告乾。乾遮殺漢昇。而以廷案等數十人。皆分

配諸番爲奴。是時廷宋等思欲歸。悲號無聊。俄見我使者至。如自天而下。皆大喜。過望。於是我使者出檄諭東埔寨。東埔寨惡楊四及妻林。負德實叛已。廼囚執楊四等。及廷宋數十人。令使者浮喇節世哪陳明。資金書一葉。象牙二百斤。蜂蠟二百斤。詣邊吏。並獻見楊四故我澄海人。幼小與其父楊君讚。乘舟至東埔。無何。讚物故。寨長老憐其少失父。孤養以爲己子。長立爲把水使。會邑中子道乾至。兩人遂相與爲刎頸交。乾有妾曰楊氏。四遂冒以爲女侄也。始攻暹羅時。國順乘機殺死番衆。廼還報唐兵寔爲之。俄寨主

惡兩人。兩人懼禍及已。一日寨生出行。兩人遁乘隙持兵器入寨。移其累重。閤匿於乾黨陳大森舟。會四勞苦。鼾睡。大森覺。乾勢敗不足恃。遁復載四往東埔也。其明年春。制置使復使使周宗睦。王文琳。賞諭東埔。令其與暹羅並攻。於是暹羅番王授計郭六觀。令禽乾。乾覺。廼格殺番衆。略其舳艫。往佛丑海嶼而去。竟莫知所終。乾之遁而鼠竄也。而給事中李選劾奏張元勳常遇乾于河渡。御史王宗戴劾奏傅應嘉遇乾于甲子所。左都御史陳外。劾奏晏繼芳。周汝敬復遇乾于河渡。當是時。以諸將親縛乾。如縛嬰兒。直易



易耳。於此是不芟夷蘊崇之。絕其本根。乃使滋蔓有今日哉。乾或曰猶在。或曰被僇殺已死。

諸良寶者。潮撫民也。隆慶中。曾一本旣伏誅。而殺賊許瑞二千人。猶逋逃在海島。寶通與瑞有隙。惡也。常稱兵相攻殺。前是寶與林道乾並皆用歸降。受我冠帶。得食膏腴田千百畝。必何寶殺略我撫民。莫應敷。敷帥瑞相與擊寶也。是時備兵潮州。使金柱。廼令裨將韓國李時魁提兵七八百人。守程洋岡。寶夜半衝營。襲殺我兵四十人。赴水溺死者五十人。已又殺二十餘人。鹵六百餘人。必何楊老歐老程老亦突犯甲。

子門殺千戶董宗儒及兵民二百二十四人。鹵千百  
所印二顆。衆男婦二百六十四人。自是後。道乾遂遠  
逃入於海。而寶亦接踵去。與林鳳合兵爲寇。亂是歲。  
上萬曆元年也。制置使殷正茂聞大怒。罵。廼令布政  
使程嗣功治糗糧。而以按察使陳奎。叅政使劉穩。按  
察副使蘇愚。顧養謙。僉事李材爲監軍。屬廣州守胡  
心得。同知毛爲光。周冕。治兵餉。而令總戎張元勳將  
大軍。期以四月望出征矣。當是時。道乾使使者鄭美  
捕伏海口。謂我師。而會何騰輝亦艤舟來鏖戰。我師  
疾鬪。生得美等六人。斬首虜六級。俘獲七人。獲船二

艘器仗二十四居頂之賊益攻潮頭市厚壘二塞我撫民魏朝義疾力戰斬首捕虜十三級獲生口賴少江等十六人我兵行捕斬洪八等六級於是副總戎李誠立提裨將范應星兵直搗騰輝巢騰輝先已渡河閩匿矣會魏朝義兵至生得陳少渠等數人輝騰恐益遠竄我師遂入其巢旦日日出餘賊前殊死與我師戰我師遇戰疾力斬首三十四級良寶遂西避而林鳳亦垂頭走八閩矣其後乃率徒屬突西犯陽江燒火通於麻濠水街會縣令陳嘉謨兵盛免竟焚燒疊岡諸村泊大金門是時詭名毛賊者誤以爲官

兵至迎戰焚良寶船十一艘諸賊赴水溺死亡筭居  
四五日復犯陽江我師銜鋒斬首二十級奪盔甲器  
仗二十有五賊乃奉頭鼠竄北津港而我師亦至平  
海外洋矣去時諸賊尙聚黨四百餘人公行外洋我  
師卽卻敵斬首二十三級生獲陳丕敬等十人而賊  
竟留泊萊蕪廣洋也於是金丹爲中將軍陳忠爲左  
將軍潘吉爲右將軍石子芳爲後將軍而曾葉文選  
亦提福建遊兵至疾力戰斬首一百一十八級溺水  
死者四百人我兵死三人傷二十一人當是時都給  
事中張書請賜大將軍斧鉞滅此而後粵東得安

枕也。前是良寶以七十艘載二千人犯陽江。我師殺  
傷幾盡。殘遺六百人還遁南洋。而橫海將軍胡震焚  
其戰艦。李誠立圍其巢穴。寶水不得舟。陸不得出。岌  
岌然。兵在其頸矣。而餘黨或奔新會。或奔香山。或奔  
崖門。皆道散亡。莫知所稅駕。我裨將黑孟陽、宋天爵  
遂北至廣海。先登斬首一十四級。奪被鹵男婦三  
十人。還攻香山。過崖門。斬首八級。生得龔一方等十  
一人。俘獲一人。白翰紀梁守愚。遂北至新會。卻敵先  
登。獲鄧與等生口四十六人。俘獲六人。奪被鹵三十  
人。是時良寶在故巢。巢皆高山。維以土垣深溝固壘。

弗肯與我師戰。中間多綿絲堅甲。其火藥如大發。煩  
百子銃等類。號最精。並守以死士。而良寶又頗習兵  
法。平時能與士卒同甘苦。及出略有所獲。輒均與士  
卒分。以故士卒皆以爲良寶親已。多從之。及圍戰有  
功。良寶亦復予重賞。令士卒皆大喜過望。今其衆多  
削髮爲誓言。誓欲爲良寶死。一可以當十。十可以當  
百。百可以當千也。我師往往列營田中。田中皆淤泥。  
彼得冒百死。乘高山俯臨我。我偏將胡震、董龍、李誠  
立。常以伏兵挑戰。會山上銃炮如雷。諸酋來以死迎  
我師。我師敗。頃之。諸酋復乘勝來衝營。偏將軍李誠

立獨騎馬走。墜馬傷左足。俄諸酋復以三十人給爲  
往田中採稻穗。誘我師。我師鏖戰。山上諸酋並發如  
雨。直擣中軍營。誠立復騎馬走。士卒被殺傷死者二  
百餘。營中空無人。略大發煩七門。百子銃二十餘門。  
烏銃百餘門。糗糧一百石。火藥八桶以去。是時按察  
使陳奎與總戎元勲聞提征山兵往擊。救於是制置  
使劾奏誠立。給事中蔡汝賢劾奉奎。事下本兵覆奏  
請。上貶奎秩二等。誠立下御史逮問。並戴罪行。師  
於是奎誠立請增兵。是日到。置使大會。布政使嗣功。  
按察使唐九德。叅政使愚。副使李渭。王璽。僉事材。及

總戎元勲庭中議議以推官施之藩裨將梁守愚往  
浙募兵卽上書請以指揮使陳璘轉遷叅將改吏目  
黃道守備俟得良寶授職如真於是以陳璘爲一軍  
立偏將沈燦王之臣二人以黃道爲一軍立偏將高  
太平一人以李誠立爲一軍立偏將董龍一人而以  
元勲統之陳烈及奎監之而又使程鄉令武尙耕東  
莞令董裕順德令胡友信海陽令馮笏澄海令左承  
芳長樂令艾鰲揭陽令林大經潮陽令蔣蘊善調度  
庶務時諸酋益驕橫令張阿二往南溪略殺會金丹  
林奇材兵先請伏內河待矣阿二至我兵忽起道驚



驚。大敗斬陳惟等首五級。還遁故巢。俄又出澄海縣澄海民陳恕率鄉兵要擊之。斬首六級。前是賊黨陳四等三人請降。我裨將董龍卽令陳四引兵三十人夜半走賊巢。伏截斬首一級。是時癸酉冬盡也。居一二日。犬日復令陳四到巢。會賊衆朝出略丹與奇村。兵轉鬪。斬賊首九級。頃我師鼓行至南洋。鹵白艚船馬舠船二十餘。會日莫。諸酋復出兵挑戰。自分更至。鷄鳴。我師銳鉏擊傷賊亡筭。賊大敗走。我師追亡至三丫港。賊已抵巢矣。巢故有四門。於是議以璘軍攻其北。道軍攻其南。誠立軍攻其西。震軍攻其東。乃下

今日有能斬一級。予三金。獲一生口者。予六金。獲諸  
良寶五百金。至衝鋒破敵。一千金。敢議令不如令者。  
斬。是時三月朔也。諸酋率其衆三百人拒我師。我裨  
將張玘等。卻敵斬首虜二級。奪獲器械三十有四。諸  
酋由此阻深溝爲險。我師以鳥銃擊殺賊四十餘人。  
俄諸酋出北門衝璘軍。璘軍生獲二人。斬首虜二級。  
震軍以鳥銃手擊東塞。乘風縱火焚其戰艦。諸酋復  
以抵巢而北。軍部索得大小船三十有二。擊毀殆盡。  
是時諸路軍乘勝勇氣益百倍。欲勦巢而海防同知  
周宗武先與監軍事。欲還。廼以屬尚耕。期旦日日出  
武山錄

大戰而黃道先期用雲梯雲車圍垣已登賊覺並出戰我兵創二百餘人賊亦多殺傷死者畧相當於是制置使請寬道罪而以裨將汪采梟斬軍中以徇自是之後諸酋盡墮壞其屋居乃掘治坑窞令四維如垣牆蓋覆以土高而維以內擇大木重樹排柵起敵臺殲死守以欺謾漢兵不能知而漢將陳璘先已建望樓樓高凡七尺其根株窟穴所在皆璘所覩記矣於是議以士卒往海上取鹹水草數十萬石實竹簍中去地皆填以土令我師得上下樓自如也居亡何潮守李多祚倅顧學仁言諸酋以三十人出西塞鉤

草賴璘軍格鬪戰諸酋始盡還巢而元勳廼爲計畫以雲梯雲車及人字竹牌蔽遮銳石用鉏於牆下掘土令底虛則圍城自倒我乃以牛車載土及草令士卒積草成山積土與賊垣平然後以柴草火器拋擲入巢我師四面而起千銃齊發彼烏能奈此炎烈何也於是幸用其計廼以木板柴草填壅濠川賊聞出略填濠草數束而去我兵創數人是夜元勳復治草爲人以三十數皆披介冑如兵賊望見我兵至廼齊舉火藥鉛錘幾盡復取血爨旂鼓時夜半至旦日天未明我兵半在土山以火箭噴筒焚其敵壘用發煩

百子鳥銃擊賊賊以銃敵我師強半在排柵下使滾刀長鎗如飛殊死戰於是我師拋擲水草諸酋復以水當我師火攻我師以一軍治牆孔一軍掘牆基湏史圍城並顛倒我師五合六聚而入李誠立董龍斬諸良寶等首三百四十六級葛浩斬首三百四十級胡震斬首一百五十級陳璘斬首二百二十四級黃道斬首一百八十級楊繼武斬首四級司桓斬首三級時三月初十也斬首擒虜凡一千一百五十級俘獲凡一百五十五人奪獲被鹵男婦凡二百餘人事聞上賜殷正茂三十金紵絲二表裏廕子有故爵

遷秩一等。令世世勿絕。遷張元勲秩一等。金幣亦如之。賜胡震等金十五兩。董龍等十兩。程嗣功等八兩。金丹等五兩。皆有差。故事。凡佐史在軍給事。及錄捷書者。俱得叙。免考辦。以省祭授職。是役得免考辦者。惟鄧松羅繼隆而已。始鄭大漢長八尺。膂力絕倫。佐史吳天賞請以把總名號提干戈。號召緣海卒。卒禽大漢。然則佐史亦武矣哉。於是本兵尚書譚綸請于上。予十金。

林鳳者。潮逋酋也。萬曆初。常與諸良賓爲徒侶。樓船將軍俞大猷常提兵問諸海島。鳳遂鼓行而去。魁港。

也。鳳度其下水淺，戰艦不得入。於是盡棄去其烏船，勿問，而以輕艇恣往來自便矣。居頃之，鳳自玄鍾還潮，謀劫略閩里，已款塞請歸降。會南洋軍書急，邇吏佯爲許降以緩其勢，而鳳竟以百餘艘突入清瀾港也。旦日日未出，廼使使者語監門，幸爲我多謝，告所吏請啓魚鑰。吾以一介使入城中，易米鹽去，不女援也。而所吏丁其運，閉關嚴，請謝絕使者。弗內。前是天久雨，城頽，鳳引其衆由頽城入，竟略畜產鹵七十人而去。是時備兵海南使陳復升提兵至銅鼓角討賊，遠所出略，遂遁入於海。是時甲戌二月也。本兵

尚書譚綸用廷議請閩廣兵夾攻。上報可之。於是制置使撫巡使在廣則殷正茂在閩則劉堯誨並皆得額征伐而裨將白翰紀胡震追亡逐北至大星海斬首二百有五級俘獲七十五人奪三十四艘焚二十餘艘艘湛赴水溺死者亡筭是時大將軍張元勳監軍副使陳烈堅壁備潮州潮州閩門戶也而閩亦以大將軍胡守仁提兵一萬人乘福船等舩一百五十艘行詣潮於南澳柘林玄鍾間問鳳乎鳳廼遂逃至香山已復自大金海至北津入汾州蓮頭灣先去矣於是胡震追亡至黃屯角衝鋒斬首捕虜五十三



級俘獲十三人。白瀚紀追亡至碇洲。會戰艦。力大不甚利。海南海南沙淺礁多。利輕舟。鳳頗習地形。所乘艇皆底平。得上下海島如蜚也。自是之後。前將軍金甌。以林奇材。潘吉舟爲一軍。中將軍宋天爵。以葉文選。黎希望。陳崇諒。舟爲一軍。後將軍李炳。石子方。以所部烏艚舟。中分軍。一軍軍碇洲。一軍軍南灣。會裨將黑陽孟。牛天秩。趨所部。許恩舟亦至。諸羽林黃頭。乘網紀哨馬等船。來勢便疾如遊龍。於是海上鼓角橫吹。舳艫相望。級邊人皆意鳳必遠遁。走死矣。鳳果遁。我裨將姚允恭。潘吉。林奇材。追亡至新英洋。卻敵。

斬首七十一級。奪獲十餘艘。被虜三十六人。會日暮。涉淺走昌化洋。而許恩跡且至臨高外海。卻敵先登。斬首一百餘人。已。鳳復自長沙港走白沙湖。我海上材官蹶張並追。逐北至鷄心大洋。鳳衆見我師。旣雲翔不可敵。欲跳身得遁走。無筴。用殊死。與我裨將陳忠。喬遷。轉鬪。適大風雨。海上白浪如山。旦日天明。疾力戰。我師生得一十四人。斬首二級。俘獲二人。是時副使金淵聞諸往來者。言曰。鳳且欲東走海。出澎湖。計畫已堅決。亡何。鳳廼走崖州。於是以陳崇諒備清瀾。胡震備碭州。以白鶴。白砂。烏兔兵並捕伏於昌

感沙沅曰。令此賊進不得攻。退不得還。此坐困之策也。鳳竟東遁。會大風從東方起。顰舟不得已。還大洲。已復從大塘開洋。鼓行至調懶外海。頃之風稍稍息。鳳得至東南深洋矣。而我師追亡。亦以北風迅急。鼓行至淵口。於是與胡震白翰紀。鏖鳳於柳渡。乃鳳先已閔匿在老萬山邊矣。是時諸所追亡將。請以其半壁于佛堂門。擔竿洲。平海。它皆乘順風。一晝夜行數百里。至碣石甲子海洋。會林福言鳳在三洲。閔軍以一軍屯馬耳。一軍屯南澳。於是鳳又走廣澳。廣澳去河渡門近矣。遇馬耳軍。竟鄉東北走。走閩海。閩中兵

威甚設。我橫海將軍度鳳勢不東走彭湖。魁港。或走浙海耳。居亾何。鳳果涉閩海。至彭湖。張元勳追至金門所而還。時六月十九矣。明年冬。巡按直指使馬應夢上書言。鳳在東番呂宋國。與國王不相能。今以九月中來彭湖。復詣魁港也。前是鳳在呂宋。築玳瑁港爲城。自號稱爲國王。欲謀協番衆。以圖閩廣。亾何制。置使劉堯誨。使使者王望高。周英等。往諭呂宋。招番兵五千人。襲港內。焚鳳舟幾盡。僅殘遺四十餘艘。鳳不能嬰城自守。復走潮。閩師追捕至廣。斬首二百級。擊破二十艘。是時鳳所遺有衆財二千餘人。舟四十

餘艘。又復爲閩將軍所擊破。得衆凡一千八百餘人。舟凡二十艘。久之。復出沒柘林。靖海。碇石之間。奪漁舟。略民船。遂至一百五十餘艘乎。給事中裴應章。謂邊吏不以此時艾玳珪之旂。爨林鳳之血。此何故之以哉。始甲子所圍。困時亦幾就禽。逃語在前。給事蔡汝賢疏。是時堯誨亦言。金淞稱閩所上首虜。多屬虛冒。而閩中又稱金淞力主撫阻我師。於是給事中蕭彥上書言。淞不宜請撫。坐法當左遷。賴吏部尚書張瀚議得寢。亡何。本兵尚書譚綸亦上書論閩浙所劾奏。皆起爭競。上乃詔曰。若同心爲國。嫌忌自無。于

時諸公卿皆叩頭稱大哉王言。其後鳳黨二澳主志善、七澳主李成竟使酋長蔡德、陳樟、李瑞奇至潮陽請撫也。曰：林鳳有死罪，顧年老污穢，不足以當斧鉞。今復走西番，願寬假。湏臾母死，實亡它腸。吾屬成黨一千三百一十四人，被鹵一百三十七人，戰艦三十五艘。善黨三百九十八人，被鹵一百二十二人，戰艦一十八艘。凡攻戰器械、火藥、硫黃盡以獻將軍。唯將軍幸賜哀憐。吾等小人竊願居將軍宇下。比編氓也。都御史凌雲翼下監軍趙可懷、劉經緯、夏道南及裨將晏繼芳等議前事，撫民皆給所居地，聽其聚黨。

武功錄

卷之二十一

李成等

如故。今先下令。令散黨。得還歸故籍。於是李成等皆叩頭如令。

讚曰

余考呂宋國。非貢夷。迺擊破林鳳。壯矣哉。及貢奉方物。尤爲至順。然道乾亦入暹羅矣。幾爲乾敗。何能不及呂宋也。良寶與兩酋並雄海上。寶獨蚤殲厥殆。盡哉。閩廣事。余聞有爭競。殆與嘉靖中江廣征張璉。湖蜀征黃中事無異。人臣尙同寅協恭和衷哉。

李茂列傳

李茂者海南撫民也。初酋長林鳳之亂，茂常爲爪牙。有狀，亡何鳳遂逃入於海，朋黨益衰。隆慶末，茂以八十艘大入樂會。會學博鄧萬行縣事，遣尉蔣志邇擊之不克。茂遂破縣及文昌。於是給諫梁問孟劾奏萬免官。頃茂自面縛請歸降，令得居郵前，視猶編戶氓也。茂部兵得歸桑梓者凡二百三十五人。入縣版圖者凡一百五十七人。居二三年乙亥，倭奴犯雙魚，茂與許恩疾力戰，得生口數十人，斬首十四級，奪獲被虜三人。殘黨赴水溺死者亡筭。是時茂等已得漢官。



名爲把總矣。上幸從大司馬議。詔賜茂等金八兩。其後丁丑。林四諸酋犯澄邁。茂部兵捕虜亞三等六人。御史詹貞吉念茂旣亡它腸。乃上書請復萬官。求比李志學例也。上不從。其後戊寅。茂竟聚黨千餘人。盜取珠池。都御史凌雲翼檄縣官檻車傳茂及得樂等軍門。因撫諭之。二酋復居海南如初。其後丁亥冬。復大入珠池。拒殺我海上樓船卒。都御史吳善乃以屬吏會御史蔡夢說行縣。遣同知董志毅沒茂及德樂舳舻入縣官海上。非藤布小舟。一切焚之。亟散黨徒。二酋居城中。亡何。茂自毀敗郵前廬舍如令。

而其徒黨猶鼓舳舻遠竄在海上乎。明年德樂乃出  
索中裝與其弟陳朝綱陳朝紀及蒼頭陳長脚那二  
等。往吳川南鄉招致亡命而茂亦使蒼頭那麼春養  
陳二蒼頭那二那勝天勝並以洪懷漳統之。旦莫治  
舳舻鼓棹而入池專以侵珠爲務先是茂與諸偷盜  
約每十吾與樂取其六以故諸偷勇於奔命也於是  
分巡使孫秉陽及總戎李棟請于制置使劉繼文乃  
使北津裨將陳震廣海裨將沈茂魏琚出濶州追逐  
至楊梅望斷池鏖戰生得梁與黃世德鄭那三等我  
兵傷十九人是歲戊子冬盡也其明年正月二十一

日。叅將楊友桂乘勝逐北。生獲李茂。陳德樂。陳朝綱。  
那二。洪懷漳。乃逮紫瓊州。其明日。餘黨六十餘人。略  
二蛋舟。偕桐艚凡八艘。直走北峙澳。復索二百餘人  
入木欄海。明日。陳朝紀入那林市。誘撫民。撫民不從。  
那林故多草廬乎。朝紀乃乘大風縱火。焚其廬以百  
數。復聚舳舻。凡一十三艘。徒黨漸增至三百餘矣。制  
置使乃使使者楊聰羅世賢持檄往招諸酋降。於是  
茂及德樂子。見漢使至。輒拔劍起舞。執聰欲斬之。已  
釋聰曰。生還若。若爲我告將軍。將軍恩貸吾父。令出  
吾等。趨倒載干戈降矣。是時酋長蔡克成最慄。

桀酋中號爲蔡番魁，乃鼓諸偷並亾抵於番，而餽資餽牽盡矣。一日夜，直從澳心墩大入加丁。新蕉大蛇諸村略諸村，餽資餽牽以去。已復聚黨至七百餘人，畧家丁諸村，遂襲清瀾所，焚營壘三十有餘。其後復大入萬州東灣諸村，焚民居二百餘所，及戰艦十餘艘。是時海南久不雨，穀貴民流，巡按御史黃正色恐有如一日不可知，叛黨內訌，黎岐外應，縱不自愛，柰疆場何？於是劾奏，餽清瀾者將黃高，孫

當逮，餽瓊崖者將楊

餽白沙寨者將李棟，餽

海南者將周

當坐不恪，瓊州守周希賢，通叛劉世

指揮使牛

高說當未減分守使徐應奎備兵使

孫秉楊教諭行文昌事林立縣丞鍾世秀皆以事請  
除罪是時給事中張希臯亦上書數楊友桂罪事下  
本兵問狀尚書王一鶚案乞等罪因移制置使酋  
中有悔禍歸農及縛致諸偷自贖者咸與恩貸有如  
怙終不悛得案治無赦於是詔免楊友桂官它輕  
重皆罰治其二月十九日蔡番鬼復犯萬陵是時都  
護邵曾和備瓊崖矣兵巡使與和躬提兵追亡逐北  
斬首捕虜五級明日與番鬼挑戰番鬼復犇入崖州  
於是海防使劉世懋以羽檄徵北津舟十八艘白鴿

舟三十艘。廣海舟一十艘。是時番鬼衆已犇入南峒矣。略海上轉穀者。欲陸行。我師火炮齊發。擊七人。傷者無筭。番鬼怒。以鐵椎。椎破招徠牌。竟開洋而去。其二十六日。犯陵水港。明日犯南燕灣。縱火燒南海山尾二村。我陳策生獲蘇彥卿。廖永伯等九人。明日大入樂會。博教港。裨將陳承祖。轉鬪。斬首一級。傷者入筭。居後二日。犯會同。焚港門。客舟一艘。復還文昌矣。文昌多陰。爲諸酋耳目者。聲爲番鬼千餘人。其後三月朔。犯黃竹。我裨將李福綜其實。實六百餘人。居以何。儋州黎兵馳文昌。生獲奸細李懷甲。赤牘。赤牘。

酋長陳二老蔡番鬼致澳黨麥仰湖大率期三月中  
舉事視燧火起卽殺監門以爲內應有狀於是逮麥  
仰湖及懷甲擊瓊州獄而諸酋遂潛入清瀾港我海  
上師多捕伏港口生得陳二老斬首十餘級明日裨  
將魏琚柳鳳陳震吳振夏翁思誨魏正並提兵至港  
口琚先登擊破舟二艘思誨擊破舟一艘振夏擊破  
舟一艘陳震同魏正擊破舟二艘自日中至晡大戰  
數十合我師用噴筒鳥銃以大攻之焚燒死者亾筭  
斬首一百二十七級明日指揮使高誼從邏卒巡徼  
道上生獲王一理等五人是時孫子裕黃允成高文

瑣待罪行間。會諸酋捕急。遂逃登陸者業已什七八矣。裕等斬首捕虜一十七級。奪獲被鹵七人。我橫海將軍鼓行至鹹水港。萬弩俱發。番鬼中流矢死。死矣。是時麥仰湖跡絀城中百餘人。瓊州知府周希賢大索郡中。郡中股栗。於是總戎李棟使使者送奉旂牌。梟斬懷甲麥仰湖。瓊州市。自是後。渠率旣伏誅。乃疏捕奸細矣。其初六日。裨將楊壽甫生獲陳春等二人。王大賦獲許二。鄭國欽等。十二人。李福獲張傑等三人。萬州獲陳三一人。文昌獲李志保等五人。馬三頭。其初七日。高詵獲葉文卿一人。林壁獲黎維任等二



人奪被虜一人。其初八日王弘烈獲陳有令等三人。高詵復獲吳世朝等十人。陳承祖獲三人。奪被虜婦一口。於是上功莫府。斬首捕虜凡五百七十級。器械凡四百二十有奇。本兵案制置臣劉繼文。總戎臣李棟。副使臣孫秉陽。功第一。其次布政使臣程拱宸。叅政臣徐應奎。臣熊惟學。按察使臣徐用檢。副使臣黃時雨。臣趙善政。僉事臣許國瓚。叅將臣邵曾和。遊擊臣沈茂。臣胡紹忠。臣孟宗文。把總臣陳震。臣陳策。臣李棟。臣甘霖。知府臣周希賢。臣林民止。同知臣李惟岳。臣方應時。通判臣劉世懋。臣徐化。臣葉茂。晚推官

臣傳國材。臣熊廷相。知州臣鄭瑞星。臣吳道源。臣陳節。知縣臣林棟。臣吳如奎。臣徐應麟。臣陳王策。臣林立。臣莫持英。臣黃四科。臣廖付易。臣黎可耕。臣張時。臣黃道克。並有。功。事。聞。詔。賜。劉。繼。文。遷。秩。一。等。金。

二十兩。紵絲表裏二純。李棟。孫秉陽。金十五兩。表裏各一純。莫茂洽。紅獅子衣一襲。絲段表裏各二純。徐應奎。邵曾和等。金十兩。陳霖。林民止等。金八兩。方應時。高詵等五兩。前是夏四月。南韻奏。王子龍之捷。兩廣奏。李圓朗之捷。不世殊勲。並在數月間。郡國有山。寧海晏之誦。云。居一二年。辛卯冬。給事中王德完論。

奏廷議二捷多不覈。大畧言李陳之變實由遊擊沈茂棠珠構。旋擒二酋。俄徒黨二三十人下海。襲城林立。張言賊衆千餘人。於是制置使使總戎提兵二千。人往討之。行未至瓊。賊黨解散矣。斬賊首不至百餘人。乃從林壽甫計。遂殺掠行旅僧道。冒功王子龍。先是南贛撫巡使秦耀奏劒斬于陣。亡何惠州判蔣杞執子龍及其家室妻子八人繫獄。奏當之成。甚於南贛不便。南贛告兩廣。廼移知府孫光啓欲以往。後惠文彈治之以滅口。光啓以爲期月之間。一子龍之身。乍死乍禽。前所稱死者僞。今禽而不以報者亦欺。

僞與欺皆非忠吾不忍以此事 陛下廼請告竟歸  
本兵既廉得狀請于 上於是劉繼文孫秉楊沈茂  
坐法免楊 劉世懋等下御史逮問 詔御史毋  
得畏避相覆蓋先是同知董志毅爲澳黨黃建所訟  
繫獄至是亦從園牆中上書訟冤書多不載然李茂  
妻符氏及其子李日新李日章陳德樂妻趙氏妾林  
氏蔡氏及其子陳仲仁陳仲行余德妻許氏及其子  
余仲良陳細妻朱氏陳朝紀妻莊氏洪懷漳妻盧氏  
妾陳氏是時久已没人秣陵功臣家爲奴婢矣

武力錄

李茂陳德樂之役

李茂陳德樂之役

李茂陳德樂之役。豈可謂非功乎。厥後王給諫所

抑何異轍也。余皆兩紀之將。誰適從乎。人言兩廣  
始上變時。輒多至數十萬。及奏成績。亦間有不盡裁  
者。此殊不然。人臣要在爲疆場芟夷醜寇。建設千百  
人功耳。卽令召虎方叔大兵所到。亦豈得盡無玉  
人者哉。

蛋賊蘇觀陞周才雄梁本豪傳

蘇觀陞周才雄石城二蛋戶也其先皆安南夷常款石城塞涕泣曰。徼人長願臣僕。由此得充蛋戶。阻烏兔多浪爲險矣。兩酋皆世擅珠池利。往往交驩大賈。得因而稱貸。廼招致四方亡命。日夜殷殷。便兵弩。飾閩具。侵犯我禁池。我禁池兵衛甚設。於是諸蛋戶乃自度。吾以白挺一日。欲橫行海島。非多集梟勇莫可者。益務爲富厚。以自雄。有如生殖。稍不可意。勢且應接豪賈不暇。諸蛋戶廩廩於子錢。日益增。恐嗣歲必無所得於豪賈。於是聚黨數千人。數出劫雷廉之間。

蕭然苦兵矣。前是酋長羅漢卿阻中路港。諸偷盜襲殺之。於是曾國賓以三十艘入海康。犯北海。是歲萬曆元年也。其二年犯上村。其四年犯合浦冠頭嶺。其五年犯永安。還入大廉角。國賓乃悔禍。肉袒請歸降。其七年佯爲珠商所迫。鼓棹而入于海。因犯南板村。殺周英。禽林一。嶺西備兵使招之降。復降。是年蘇觀陞。周才雄亦以十八艘入合浦。犯乾體村。斬蛋民林三。焚燒男婦六人。畜產亡筭。其後又犯安南永安州。我兵追亡逐北。甚急。觀陞等乃遁逃。還烏兔。烏兔北枕高山。南濱大海。亦用武之區也。於是使梓人采大

木十韋以上。建屋居。令部曲相保。爲塹壘。木樵校聯。不絕開東西二大門。其一門面大海。往來幸得通。它門皆重封。誠門者弗爲通。啓閉必張旗志。鳴金鼓鼓。吹張大海島。唯恐我橫海將軍麾蓋。一旦蚤臨也。夜常以邏卒數十人。銜枚擊刁斗。五分更。巡徼道上。至旦。日日出。乃已。已乃擊牛酒饗士。士亦受陞等厚賞。賚唯恐陞等有如一日不可知。敗頗死戰。乃復聚黨千餘人。治舳艫三十餘艘。並出海。其九年。犯斷州。斷州去永安所近矣。是時百戶張祿。備白沙哨。千戶田治。備濱蒞哨。聞陞等將至。皆援於環甲。誓不與陞等



俱生。於是張禕攻其東。田治攻其西。治猶長於擊劒。平。每擊劒。必以長短橫行。諸蛋中。諸蛋中多傷金夷。遂赴水。寧溺死。僅斬首九級。生獲林細武等八人。諸蛋中自以爲能不及也。自是後。諸蛋中亦募善擊劒人出挑戰。治度蛋衆無它技。易蛋。蛋儉卒圍治。治及兵士王致祥。皆身被十餘創死。於是都護使陳居仁及廉州推官汪堯卿引白鴿寨兵追逐。斬吳三蘇希堯首四級。陞等竟揚揚令榜人擊鼓。鼓行還阜也。居頃之。伍畏譚明理等訟于廉州守丁有周。雷州同知嚴淮曰。府不亟請斧鉞。恐吾等後無種矣。以何諸蛋。

賊復突入東山殺軍人鄧邦進吳得賢等。因謂邊吏曰。亟還我前所鹵徒黨乃已。不還我。我今以數千人虔劉疆場也。是日分守嶺西使張明正。分守海北使陸萬鍾。及分巡使徐時可。薛夢雷。都護陳居仁。請于制置使劉堯誨曰。此吾驕諸蛋罪也。願滅此而後朝食。於是樓船以二十七艘爲西哨。遣把總李如桂將之以三十一艘爲東哨。遣指揮文濟武將之又懼其遂登陸逸走也。陸雷門兵爲一軍。屬指揮胡統忠。由息安入。廉州兵爲一軍。屬指揮王梁。由海川入。高州兵爲一軍。屬千戶張尚仁。由橫州入。皆以總戎黃

應甲及都護陳居仁統之。是時分守使軍石城。備兵使軍永安。下令諸蛋。有自縛歸降者。聽期以九月十八日出師。諸蛋既聞大兵雲翔而至。乃夜半從欖樹港遁逃井村。我橫海將軍追亡逐北。直擣其巢。生獲蘇觀敬。蘇觀深。陳鷹爪等一百一十九人。保姦李志岳等二十一人。千戶傅大明。朱大震。生獲蘇觀陞。蘇觀祥等七十二人。保姦王廷幹等一十人。是時大風從西南來。諸蛋舟多湛舡死。陳居仁追逐至海康。生獲林德輝等八人。經歷龔一舉。生獲陳隆全等九人。指揮顧汝錫。生得鄧蠻等五人。裨將梁朝。生得李天

元等九人及保姦李金鍾指揮胡紹忠千戶楊孟仁  
生得蘇子望等十人及保姦莫賢把總李汝桂追逐  
至潤州生獲周廷佐等十人雷州兵生得張本榮等  
六十九人保姦朱太等七人於是諸偷盜林允厚蘇  
朝德等七十餘人見勢力益衰落乃太息曰與我死  
刀鋸孰若自縛而請將軍因以所治舳艫及器械具  
沒縣官得湔除前罪緩繫臣湏臾母死酋長陳泉偃  
疆寧願死刀鋸不從於是厚等疆縛陳泉及蘇三等  
三人獻見將軍將軍許諾然恐它賊醜復遁逃滋蔓  
野陳居仁乃引李如桂兵疏捕斬林維綱首一級鹵  
武力像

獲鍾永實等七十九人。明日，獲周光蔭等二十七人。

周才雄於是爲石城所生得矣。其後梁本豪復亂。

梁本豪者，亦廣海蛋酋也。先是曾一本稱雄海上，蒙  
乃與馬國政、陳世元誘導入城中。後本伏歐刀死。豪  
等奉頭鼠竄入于海。朋黨漸增。於是乃有梁本明之  
酋、馬國隆之酋、馬本高之酋、陳宗明之酋、陳宗易之  
酋、張廷爵之酋、石志和之酋、石志亮之酋、布君寵之  
酋、布尚韜之酋、布尚敬之酋、布君裕之酋、楊汝俊之  
酋、郭孔卿之酋，千餘人。專往來波羅、香山、三水、東西  
海，日夜習水戰，舟楫或八櫓，或十櫓，皆不必使榜人。

諸蛋賊能自操舟乘風行波濤殆若閃電一旦有  
急輒走入水水不能爲災海上號爲水獺云其人女  
子勇倍於男兒子徙疆於壯視我海上師一可當百  
我伏波將軍常治兵捕禦諸蛋賊皆飄忽無常所我  
使使者逮捕不可得籍第令捕急畏見使者此必土  
人土人必舍舟登山山中諸編氓其爲保姦諸偷徃  
往亾抵其家久闕匿使者在門門中無老少皆出見  
罕稱此門中無盜不容口不知此一使者及公庭左  
右皆長爲諸蛋賊耳目諸蛋賊亦不復畏見使者也  
前是漢人誘倭奴入中國頗疆盛本豪等常聲欲盡

殺官兵。流劫諸郡。於是以為非倭奴莫可者。倭奴種類殊兇悍。不畏死。豪復往西番。交驩林道乾。本豪於是志不在小矣。制置使陳瑞。監察直指使羅應鶴。智叅及此。乃與布政使李江。王元敬。按察使趙可懷。叅政使徐時可。周之屏議。以為本豪前此殺千戶濮漢典。父林煌。略通判駱秉韶。卿大夫鄧濬。及孝廉黎思勉。守猶不足患。患在倭與林酋相群輩為奸也。乃上書請復廣州標兵數百人。於是治戰艦。募水兵。常從裨將旦。巡徼海上。當是時。倭奴已揚揚鼓棹來。先是海澄人林通。林濱。張保。偕二十五人。闖出財。

物往高州。行至方鞋海。道逢倭。倭殺略之。亾何大入。上表老萬洋。殺周亞三。略李氏。何氏。陳二。仵家產而去。是時倭奴固已千餘數矣。始漁人楊玉在長沙港。見倭操一輕舟。舟不滿八十人。亾何漢人多爲爪牙者。海上俗。故造烏槽。橫江舩。因緣爲利。頃徵稅太苛。報罷。海上無以爲資。皆捐故業。往從倭與蛋矣。於是制置使移總戎黃應甲。及副總戎于嵩。追逐至蛇洲。裨將黃長福。衝鋒擊沉倭舟。赴水溺死亾筭。獲生口七人。斬首捕虜一十二級。時壬午六月也。諸蛋賊在沙頭。劫略鄧宅。執其男婦。請贖。我橫海將軍盡髮上。



指冠謂倭與蛋。桀暴不當如是耶。於是指揮徐瑞湯引樓船卒一千二百人爲一軍。軍老萬。南備倭。把總張容正引樓船卒一千二百人爲一軍。軍虎門。東備蛋。以叅將楊爲棟引兵一千三百人。白翰紀引兵七百人。備外海。遊擊沈茂及指揮王權。趙升引兵一千五百人。把總陳宗亮引兵二百人。備內海。戴恩引兵八百人。備公鷄頭。急水門。牛思弼引兵六百人。備三州柳渡灣。而分守使周之屏亦引兵一千三百人。同知朱一朽引兵二百五十餘人。營居中。皆令乘白艚大艘。不足則及漁舟。我師分十道盡出。期七月初

十日五合六聚而至。於是海上師提劔揮鼓衝鋒。湛  
蛋船二十餘艘。蛋衆多赴水溺死者。生獲梁本豪馬  
國隆等四十二人。俘獲四十四人。奪蛋舟三艘。我兵  
陣亡一十二人。趙升生獲楊俊等四十二人。斬首一  
十九級。我兵傷一十九人。把總江應晴。龍鏗。獲生口  
四人。斬首八級。俘獲六人。我兵亡一人。傷二十六人。  
殺傷大相當。沈茂。王權。獲生口二人。斬首十一級。陳  
宗亮。獲生口三人。斬首一級。俘獲七人。我兵傷四人。  
楊爲棟。生得三十三人。百戶何鳳。生獲一人。斬首三  
十一級。俘獲四十人。白翰紀。獲生口三十三人。斬首

一級。俘獲一十八人。奪器仗一百七十有七人。我兵傷六人。晏繼芳生得二人。俘獲四人。它一切盡奔石茅洲。其後十一日。翰紀追亡逐北。生得九十餘人。斬首三百級。湛船一十一艘。復由大虎門出外洋。十四日。復追逐至九洲洋。大戰數十合。爲棟生獲十三人。俘獲八十三人。我兵傷九人。翰紀生獲二十九人。斬首四十四級。俘獲四十八人。奪倭刀一十有二。把總陳鳳及周正周岳皆生得三十人。斬首二十五級。奪倭船一艘。江應晴生得二十四人。斬首三級。俘獲一十四人。奪船五艘。我兵亡五人。傷二十四人。主權生

得四十二人。俘獲二十五人。趙升獲生口八人。俘獲一十七人。陳宗諒生得四人。俘獲十人。楊尚斌生獲一人。武生吳利見生得六人。俘獲八人。知事楊鎮生得五人。俘獲十三人。奪船一艘。諸蛋賊於是復奔譚洲沙灣。聚船二百餘艘。及倭船十餘艘。並入老萬山。相爲犄角。拒敵我兵。十七日。沈茂追逐至譚洲沙灣。擊沉賊船二十餘艘。溺水死者二百餘人。王權。趙升。生得馬本高等五百人。斬首四百級。奪倭刀三十。是日楊爲棟亦追至老萬洋。擊湛賊舟十三艘。生得真倭十五人。斬首一百七十八級。百戶何鳳斬首三

級奪獲倭舟八艘。倭刀二百一十有五。我兵亡十七人。傷二十人。提舉翁仲益生得馬留仔等四十二人。俘獲十五人。千戶劉崇生得十一人。俘獲十三人。餘黨皆聽撫。凡二千五百餘人。是時調度內郡者。知府則周啓祥。王泮。推官則陳紹功。知縣則周文卿。馮生虞。游應龍。葉初春。陳楊產。於是制置使使者奉捷書以聞。事下兵部尚書梁夢龍議。請以十一月初三日。上常朝之期。御前宣奏捷音已。百官皆吉服。大鴻臚致詞。行五拜三叩頭禮。先期。儀部移太史爲文章。太常具祭品。是日。上遣公朱應禎告南

郊侯孫世忠告

北郊侯李偉告

太廟畢本兵論

功行賞

賜陳瑞金四十兩。大紅紵絲飛魚衣一襲。

黃應甲。金三十兩。紵絲二表裏。朱東光。楊爲棟。陳鳳

金二十兩。李江等。陳紹等。金十五兩。于嵩等。周啓祥

等。金十兩。始

京師聞撫蛋至二千五百餘人。心竊

疑之。唯恐陽撫陰叛。異日廻復爲我肘腋之禍也。

讀曰

尚書。明王慎德。四夷咸賓。而况茲偷盜乎。余聞薊遼

吳司馬允。乃亦以是日宣捷。奇哉。非

天子聖神文

武。不易有此。余獨怪蛋賊。故安南夷種也。何以令其

武功錄

三六卷

三

滋蔓海上乎。蔓難圖也。田治以擊劍聞。乃死于金夷。  
其甚矣。其不講于刺劍之術也。

林奇材魏朝儀莫應敷黃瑞劉興策列傳

林奇材者許瑞許謙之後也。始吳平曾一本發難時。瑞實相佐助爲紆逆。隆慶中。廼詣指揮使金丹請歸降。丹因徃雷洋曉譬之。降。令從征。於是生德程希武及林容等千餘人。奪獲被鹵七百人。瑞以故得除罪。居潮溪東。瑞遂擅海洋之利。會林道乾諸良寶。魏朝儀與爭利。廼構兵攻瑞。瑞復奔廣海。制置使殷正茂使佐史吳天賞令瑞西征。瑞又生得倭一百有四人。數戰數捷。能頗積功勞矣。俄又乞居惠海豐。不幸道逢霧露卒於軍。令以謙代之。謙提兵至大澳。得倭生



七十餘人。海賊楊老仔等二十人。俄復至牛角灣。斬許俊美等二百餘級。俄又至三洲。斬鄭大漢首二百級。是後謙亦隨物故矣。材承其後。逢廼諸良寶反也。提桴鼓立軍門口。阿寨世爲疆場效橫海之功。何至當吾世。而令良寶得公行海島乎。於是與金丹捕伏內河。會良寶率其黨出略穀。材起兵鏖戰。捕斬陳惟善等首五級。材竟而擄良寶巢。全捷。斬首一百四十餘級。自是後。材益從金丹潘吉輩。與羽林黃頭追林鳳西走瓊崖儋感之洋。東驅彭湖琉球之域。始至所英時。斬賊首七十一級。奪獲十餘艘。被虜三十六

人。是時材已得冠帶。名爲把總矣。制置使殷正茂念材久勞苦海上。令叅議夏道南副使李材及同知周宗武以材入海。圖籍。於是材黨散歸者。凡七百九十二人。爲兵礮石者。凡二百人。爲民附籍者。凡一百九十五人。是歲萬曆三年也。其後兵部尚書譚綸從置制使請。以材比許朝光故事。授平海鎮撫使。上從之。材始有田二十七畝。起田中從軍。何知尺籍伍符哉。今得公于此。君子謂材。於是乎勇而能恭矣。魏朝義者。潮海寇也。隆慶中。與曾一本。林道乾諸良寶。並雄海上。頂之一本伏誅。朝義自度吾犬馬齒長。

不足以當其質。何乃以身試法。而直爲此廩廩。奸將  
軍旂鼓哉。孰與爲治民便。於是詣疆吏受撫。請居大  
家井。部兵六百一十一人。居二三年。制置使殷正茂  
帥橫海將軍往問良寶罪。廼以羽檄徵朝義兵。朝義  
塞井夷竈曰。此行請梟斬良寶首報將軍。願受將軍  
一廬。不復憚。久居塞下矣。趨治裝行。會諸賊出劫  
湖頭市。厚莖義偕澄海簿陸錦遇戰。疾力生得澳主  
賴少江等一十六人。斬首一十三級。復行捕斬洪八  
等首六級。居五六日。復提兵至河渡口。先登生得陳  
少渠。遂有何騰輝巢。由此林奇材等得併力攻寶矣。

寶旣就僂。義輒嘆曰。小人不始蚤自裁。幾是乎。始義所居寨。皆有圍垣。甚壯麗。足以自蔽。行則有白艚船。自恃吾以數百人。披倭甲。綿甲。皮甲。冠藤盔。佩撻刀。及手持佛郎機。大發煩。烏銃。鐵砲。西瓜砲。橫行海上。海上烏柰阿義何。亡何。義歸自上海。卽先毀敗其巢。居令黨與六百餘人。皆散歸。因自縛。交手足。令妻小送奉。曩所治諸戰陳具。並請于監軍陳烈曰。願不復履矢石。第挾其累重居城中。得比編戶氓。頗足愉快矣。唯將軍待以不死。得及此。是歲萬曆乙亥也。於是制置使與分守使趙可懷。高肇。及大將軍張元勳。吳

京梁守愚議議以推官施之藩丁士髦往案之果如義所請亡它腸然後以義居潮州城後六年庚辰海上捕乾不可得制置使劉堯誨以爲必朝義乃足當道乾廼用義及許恩募海兵二千三百人乘二十五艘復入海索乾。

莫應敷者亦潮海寇也其先許朝光烏鈔海上光旣就誅而部黨曾一本等猶雌伏在海島亂隆慶中我橫海將軍赤白囊十餘上請征本是時應敷先受撫在東湖寨矣會林道乾魏朝義諸良寶皆提桴鼓積功勞曰吾備兵大家井令一本遂裹足不敢入郡界

可乎。自是後，敷廼散其部黨四百二十有三人，與朝  
光男許國柱並請於行澄海軍。普寧知縣劉鈍曰：小  
人願居城中，竊比編戶氓。今其巢穴俱已毀敗，無類  
矣。曩所治烏銃及銅鐵百子，發煩鐵彈，已慮數種，並  
皆送奉縣備它盜。小人既老，毫髮如此種種矣，何能  
復效它年年少推鋒賤計。終自青稟，願爲是不軌，令  
刀鋸旦莫在其頸乎。敷於是請入澄海籍，居城中。始  
敷所築圍牆甚壯麗，足以示威。一旦毀巢散黨曰：寧  
爲治民，使阿寨生荆棘，麋鹿遊干戈之場也。

黃瑞者，潮山寇也。與酋長蘇繼相、曾奎、杜高山等常

出劫旁近江閩廣諸郡。亡何相竟提黃巢自力爲天  
一大王。是時奎亦據石磴。而大順鄉居其中。瑞與劉  
興策實巢焉。延袤百餘里。腴田萬頃。壯哉巢。吾所聞  
惠潮獨是耳。嘉靖末。瑞旣受撫。大將軍提斧鉞征三  
苗。瑞頗欲自効。其後杜高山使使者。張大至。瑞巢請  
糴。瑞微以告將軍。令將卒得執張大。鋤鑕至石巖。具  
知杜苗所在。於是諸將卒並發生。獲高山。斬首二百  
五十八級。秋毫皆瑞力也。瑞於是嘆曰。社稷有靈。  
如杜苗等。此不過鼠竊狗偷。何足築城郭。建官號。遷  
偃然南面稱王乎。小人誠厭薄此。屬不自量。輒旋底。

滅亡首足異處。今決筴帥部黨四百五十餘人請待  
命將軍。幸得受程鄉一座爲之民足吾事矣。吾去諸  
公休矣。幸賣刀劍勉於隄畝。吾將老于程鄉。於是瑞  
拜諸部黨亦拜相與揖別去。瑞自是入程鄉籍居村  
落。視猶編戶氓。非復前日阿瑞也。

劉興策者亦潮山寇也。嘉靖中受撫居大坪寨。已徙  
赤秋溪與蘇繼相巢。鼎足而立。多奪人田產。田產至  
萬餘頃。居頃之大將軍郭成征繼相。念以爲非策莫  
可者。廼調策往。策曰。始蘇繼相曾奎依我及黃瑞。誠  
有之。有死罪當屏居胡貉之地。以死。願瑞今幸擒滅



杜高山已毀巢散黨得比程鄉民余獨柰何冷相與  
牽長嬰大罪而吾且冒不韙久延不得與瑞優遊縣  
城中立功疆場爲治民大自愉快乎吾今決策吾東  
艾繼相西會曾奎矣於是與裨將邢文松等直擣其  
巢果生得繼相俄斬曾奎曰自是可以報將軍矣策  
旣還歸卽毀原其巢散分其部黨六百七十餘人皆  
歸農而策得附揭陽籍矣始策罹霜露病未得謁知  
府李多祚居月餘揭陽知縣林大經以策至郡謁郡  
守及上官皆叩頭跪起如編氓禮策乃大喜曰不圖  
得見漢官儀至此自是後策所居巢請改建撫館以

通判一人填之。其下去海陽程鄉揭陽皆二百餘里。往往嗾所部公負賦稅蠶食撫民利在撫民復叛而以得執兵戈遂有辭計如此矣。曩者余論之寧爲禍首何乃罪撫民哉。

讚曰

法曰禍莫大于殺已降。又曰夫人深信我我背之不祥。豈虛語邪。始林道乾諸良實歸降時假使我遼東背而殺之。豈致滋蔓而說者曰禍始治氓何哉。緣邊諸治氓籍有寇兵因緣爲姦託名荒蕪通負縣官往往而有甚至撫民少拂其意輒據拾往事巧詆于法。

武功錄

不勸與策所傳

七人

令令不食其土反激而復去悲夫寧爲禍首何乃罪  
撫民哉

羅旁稍浪列傳

羅旁諸徭者。盤瓠苗裔也。祖宗朝。巡撫使馬景。葉

盛韓雍。秦紘。同討。征未克。報罷。今丙子十一月。撫巡

使凌雲翼往也。細經緯。以副使從。引朱珏軍。擊之。龜

百片等七十七巢。破之。沈子木。周浩。以叅政使從。木

引倪中化軍。擊進。攻石子等四十一巢。浩引徐大

麟。祖萬松軍。攻黃姜伏竿等七十五巢。盡破之。僉事

李一廸。引黃允中軍。至上下臺等四十巢。大破之。徐

汝陽。引劉天慶。葛浩。朱文達。陳典。李戡軍。擊雲稍。取

龍塘等六十六巢。破之。還擊鐵場等五十七巢。破之。

秦舜翰何子明以參議使從翰引王瑞軍圍函口取  
北科等四十六巢大破之明引楊瑄軍擊大黃巖等  
七十二巢破之劉志伊以按察使引陳璘侯熙軍擊  
風峒等四十八巢復攻蘇坑等四十二巢破之請數  
自十一月二十至明年三月十五盡定獯巢凡五百  
六十四所斬首凡一萬六千一百四級俘獲凡二萬  
三千一百五十六人奪被囿凡三千六十九人降獯  
凡四百九十三人獲器械凡六千二十一畜產亾筭  
於是乃遷交雲翼爲御史大夫賜金四十大紅紵  
絲飛魚

襲遷張元勳爲右都督賜勳及李錫

金銀幣帛有差。皆廢一子。爲千百戶。世世勿絕。賜  
趙可懷陳璘爵一級。金二十兩。周浩等爵一級。金十五  
兩。朱珏等十兩。劉朴等八兩。蕭成等六兩。賜侯應  
爵。四品服色。金十兩。卹錄者唯劉天慶而已。羅旁廣  
一千五百里。在萬山中。多林木巖洞。道里皆蹊逕。一  
旦有緩急。輒走它旁。近寨閭匿。一姓而二名。如孔子  
成曰。孔紹太。龐力王曰。龐公定。一人而數名。姓如謝  
月蘭。黃朝泰。簡總管。龐勝龍曰。鄧勝龍。籍第令母閼  
匿。固無能辨識矣。而又有四方亡抵于巢者。號曰浪  
賊。甘心酋長鳳三舍。陳第平。盤大面。汪岐山等。以爲

瓜牙視殺人猶艾草菅見旁近美田宅盡奪而有之  
今其下厥田沃壤頗有砂仁藤蠟蜜漆可採以爲利  
難坐因我師行未至隘口皆逗遛不進賊度我師必  
不能入廼以請款嘗試我我名降猺曰良猺降浪曰  
撫民然干戈未及倒載牛馬未及放散而猺浪輒從  
中起矣乍降乍叛皆此類初凌司馬度此屬非用間  
莫可廼以便宜立招撫使十人奉檄以往令欲歸降  
者皆請招撫使自占姓名書于冊臨軍營團給爲營  
而以招撫使居其中得分玉石於是諸酋信者什二  
三而以計中我者固什七八矣我皆厚以賞賚示毋

疑招撫使乃得窮其根株窟穴所在。且此屬計不過守險耳。乃徵狼兵十六萬人。浙兵五千人。及土兵。大率二十萬。是日卽上書。請予告副使李材。添註肇慶府。名曰靖夷道。視松陽知縣。羅拱宸爲浙江僉事。注曰練兵道例也。於是拜朱珏爲將軍。軍羅旁。劉天慶爲將軍。軍瀧水。陳璘爲將軍。軍信宜。王瑞爲將軍。軍岑溪。楊瑄爲將軍。軍宜春。陳典爲將軍。軍新興。倪中化爲將軍。軍德慶。黃允中爲將軍。軍伏峒。徐天麟爲將軍。軍南鄉。侯熙爲將軍。軍茂名。十道並出。而以兩廣總戎張元勳。李錫爲大將軍。營居中。令副觀察。



趙可懷監之。是時諸酋皆大半棄田。未耕恐焚燒我積聚。以老我師。於是議本折各半。前事土吏提桴鼓至營。輒送奉將軍鞍馬。及稟食縣官。大率減什二三。而其末也。論功實授。又必俟請求而後可得。敗無利。勝亦無利。無利等耳。凌司馬幸而著爲令。令將軍毋蹈前轍。又從子木議。先以金懸示狼兵。凡獲一捷者。予金一兩。狼兵見曩時大征。多不給賞。常欲以拾略爲務。一旦軍門縣金。果喜。廼用死疾戰。是時東山有富祿之險。栗子之險。羅石之險。攬凹之險。富林之險。雙峒之險。灣口之險。西山則有都門之險。古芎之險。

鳳凰之險。鷄籠山之險。由此搜山索峒。幾無遺類。多  
狼兵力也。先是瀧水縣斗絕在東西山之中。孤縣賊  
巢。常募兵一千人。而以千戶填之。然公移輒從樓船  
卒往來也。自是之後。請陞爲州。而以廉州同知侯應  
爵下行州事。至東山黃姜峒。西山大峒。皆寬平。請建  
縣。黃姜去德慶大江三十里。大峒去德慶大江二十  
里。徙民居其中。一衣帶水而下。烟火相望。亦一都會  
也。上下戶部尚書殷正茂議可之。賜名曰羅定。  
州。是時黃姜之南六十里。曰南鄉。南鄉之西南一百  
里。曰富霖。大峒之東南七十里。曰封門。封門之南。

百二十里。曰函口。議建守禦使。然南鄉東南去新興西去隴水。皆一百二十里。富霖東南去陽春。可一百五十里。西北去瀧水。可一百二十里。封門東去瀧水。可一百里。西去岑溪。可一百五十里。函口西南去信宜。可一百二十里。東北去隴水。可一百八十里。西北去岑溪。可一百七十里。請一守禦使。歲時從走卒擊刁斗。行徼道上。而以嶺西兵巡使。改爲兵備使。居瀧水。統之。則誰敢復于旂鼓哉。其後撫巡使劉堯誨移侯應爵。徐時可。度田五萬八千四百七十畝。招徠流移二千四百二十四人。西山築城郭。建公館。開道路。

改晉康瀧水。蒔溝平豆。掘岡大陵。諸郵傳費以一萬一千六百數。於是東山曰東安縣。西山曰西寧縣。自此始是歲丁丑也。前是上有詔。賜尚書殷正茂金四十兩。紵絲二表裏。木兵王崇古金五十兩。大紅紵絲蟒衣一襲。梁夢龍。曾省吾。金二十兩。紵絲二表裏。所司皆賜爵一級。金十兩。贈譚綸卹典。及功叙廕如禮。於是保章氏釋五月十九日。御前宣捷。已令太史爲文。太常具俎豆。遣上公徹侯駙馬祭告南郊。太廟。是時渠率雖誅殺。賊猶存乎。其後已卯月正元日。東山則浪賊誘撫猺。西山則皆粵西岑溪。

六十三山七山諸峒賊及脫卒亡慮千餘人犯思慮營傷哨官丁天祿二十五日犯燈心大傘營殺哨官張文明我兵廖尾陳元等先後死者九十餘人明日封門所僉事侯應璧引把總伍科擊破之斬首捕房二十三級於是御史龔懋賢以其狀請明年夏撫巡使使使者齎新印至州州遣典史梁有達送奉舊印行至道州會譚公慎譚世治等三十餘人殺佐史奪其印而去御史梅淳劾奏叅將陳璘故事自南江至石狗營屬東山自石狗營至連灘屬西山而以康巡檢使巡徼江上皆以辰時發舟璘於是坐不

法。乃與朱文達進攻石牛青水諸巢。斬捕首虜三百六十六級。奪獲印記一顆。器仗二百五十有二。此皆紅豆鐵場餘黨。曩所未撫之寇也。當是時。瓊崖之間。倭番亦乘汎。稱亂哉。以陛下之斧鉞。實式臨之。總戎黃應甲。把總梁國賓。及兵使者王來賢。薛夢雷。瓊州知府唐可封等。提黃頭郎問諸海濱。乃斬捕倭首二十五級。番首一百八十六級。奪獲被鹵男婦二百六十九人。船艇二十有三。器仗一千四百三十有七。於是兵部尚書方逢時。案撫巡使劉堯誨。請賜黃應甲等金十五兩。顧崇文。唐可封。金十兩。梁國賓。五

兩始羅旁之役。土吏從征者。思明則黃承祖。忠州則黃有翰。雷峒則許宗蔭。及其子許應奎。萬承州則許國璉。上映峒則許世興。永順則鄧得陽。彭大武鎮安則韋農。全茗則許福海。湖閩寨則岑壽松。歸州則岑瑾。南丹則莫之厚。田州則岑太祿。以坐法免者。唯泗城岑紹勲而已。上乃賜許宗蔭。許應奎。金二十兩。許國璉等十兩。爰者余論之。干戈未及倒載。牛馬未及放散。而徭浪輒從中起。然寧使愚言不驗。令嶺西受其福也。

讚曰

余觀故志。自鄧國公破殺之後。歷景泰天順成化。靖皆未稱捷。豈不誠慄悍哉。凌司馬提兵二十萬。始蕩其巢穴。而郡縣之。此與幕南無王庭何異。詩不云乎。行百里者。半于九十。此言末路之難也。道洲之役。可稱覆轍。余旣聞新邑多沃土膏壤。尙徙民耕且守。可也。



## 黎岐列傳

黎岐者。故南恩藤梧高化人也。姓符氏。主氏。自始祖從征至瓊。利瓊島中地。遂居焉。而父老傳謂感南風而生。故名其山曰黎母山。曰種類最慄悍。唐乾封中。常陷瓊。至貞元時。始克復之。自是之後。黎岐在五指山。生育日繁衍。弗役屬縣官。縣官分爲二種。一曰黎。一曰岐。其歲時賦粟者。命曰熟黎。否。命曰生黎。而其人雖倔強乎。然皆不長于干戈。專以弧矢爲務。兒能引弓習射。少長。則射麋。以皮市于澳。得利。然亦常居稻田之業。獨弗耕耳。而以牛躡蹂其水土。而用木葉。

其之異時得稻稔甚美類漢種其俗女子尤勤女紅得漢絲帛折色絲和吉貝織花如所稱黎錦黎單之類世多有男子出入持弓矢不釋手卽與賓朋飲必三舉觴然後請弛備亦不離左右語言稍稍不相能輒攘臂而起其天性也其弓矢用竹鏃用鐵甲用角戈用標刀然見漢火器則遠走不羞遁逃雖至產出田禾所在猶不却顧也自肩主以下咸采葵葉爲屋如窩棚狀其男子黠結蠻夷服無常而以銀鐵爲簪羽毛飾之跣足女子亦如之獨刺其面爲文銀簪耳環禪一筒富者出入乘馬鳴鏐女子年將笄置酒會

親戚鄰峒。春鞦韆。亦如之。凡男女出遊。歌舞呼巷。名曰作劇。設有乘時爲婚合者。父母亦弗禁。顧以牛之多寡爲崇薄焉。其民畏母而不畏父。父子相爭。則射殺之。母出勸。則止。凡若此類。皆閩廣香賈。徃徃至其地。因風聞焉。始沉束香在黎山。黎莫得而識。而廣閩闌出財物者。識之。因名曰香仔。遂公請爲賈。而因爲黎師。誘之爲亂。自是僭崖萬樂之間。蕭然苦兵矣。先是紹定四年中。王居起爲寇。宋遣大將軍提兵擊之。未克。其明年誘致渠率至莫下。梟斬之。傳首京師。而昌化臨高澄邁。空無生黎。生黎時有候者到。罕而希。

矣。其後咸淳六年，欽守馬成旺擊走黎于瓊中。是後天子以成旺守瓊，管諸峒。諸峒益讐服。及至元二十八年，黎復盜邊。廉希恕等發兵擊破之。其明年秋，大將軍朱斌直搗其巢，得生口二萬二千八百二十七。峒六百。其明年春，刻石五指黎婺而還。是歲孫譯請立寨學，訓諭諸峒。已又請置屯田府，立定安會同縣，萬金寨。詔皆從之。至順元年，王馬同等復聚諸黎反，會同、樂會、萬州諸縣主簿譚汝楫請徵楚兵，閩兵及粵西獠兵，擊破之。自是之後，我高皇帝以干戈平定海內，遣永嘉侯朱亮祖發兵出雷州，雷州率其

衆來降。獨深峒生黎不至。於是海南諸將軍並稱兵以討之。頃幸立土舍。然終不可羈縻也。未幾朝太學生潘隆請得往招黎。上幸賜隆視縣令秩。使往諭之。亾何黎人陳忠等果如隆指。請朝見。後成化五年儋州七方黎符那南亦復亂。指揮侯王璉發兵大破之。落窪峒黎符那推又復亂。副使塗裴又發兵大破之。然自紹定以來。斧鉞所指。固亾不摧滅者矣。而弘治時符南蛇之役。叅議劉信獨敗北。幸賴伏羌將軍毛銳率漢達狼土兵十萬出儋州大破之。其後嘉靖隆萬之間。又倔强虜千戶。虔知縣擒州判倅殺尉史。

幾莫敢誰何。今歲上之丙戌，長田峒復捨我陵水也。而我備兵使易公執而戮之。會草子坡諸黎喜報復，敢因緣姚本道大戰于長沙營。於是兵憲使提兵出白禿嶺，同知董志毅提兵出萬州，司訓林立提兵出萬陵，大率斬首八十級。當是時，黃村田尾諸峒皆奉頭鼠竄之不暇，何問它乎？已廼請曰：將軍第幸哀憐我，寬假我死罪，得請衣冠易胡服。歲時誠願輸粟米七十石比。天子編氓也，始黎爲兒時，常引弓習馳射，發三矢而不中格，輒謂漢人不當死，卽棄之而中走，其好爲大言類如此。然聞其馳射頗最工，誠足自

踰躍。獨不能及遠。然三十步之內。矢無虛發也。居常自謂阿弓。神弓。今我軍以火器臨之。直就縛耳。誰令而得自謂阿弓神弓也。

讚曰

黎岐乎。黎岐乎。恐不得長。鼯睡于瓊之心腹也。裴丘文莊。海軍中丞。常欲伐木剪薊。開山闢路。以芟蕝之。而說者以爲煙嵐毒瘴。當之者常什七八死。而又有飛騎入人耳。則如中流矢亦死。今長田之戰。抑獨何哉。至粵東志。所標引五指山。膏田沃土。盡爲亡命豪強所竊據。幸賊發而欲資以爲姦。則余不敢道也。

羅定東山叛兵列傳

羅定叛兵者。皆閩廣撫民也。先是羅旁酋長鳳三舍等。阻羅旁爲險。於是徵閩廣撫民江子德。劉順業等。爲兵中路營。其後羅旁旣平定。而裨將張元韶。朱甫等。於諸軍稟食縣官。輒從中漁獵。由此諸軍益仇怨韶等。曰。毋乃鬼死狗烹乎。於是九百餘人。並挈馬兔走江上。奪江上客舟。遂入於江。是時德等以烏合從軍。何知有尺籍伍符乎。會春深多瘴。凡軍中思歸者。皆附德歸。以故德黨益繁。行至消遠。從化林塘。苦竹坑。鹵獲諸生黃元佐。及男婦二百餘人。曰。而無錢贖。



吾不貴而矣。諸行舟。於是皆遠徙。江上虛無人。人人唯恐逢德等亂也。而我兵行捕。生獲亂首子德順業二人。梟斬軍中以徇。它皆歸降。於是制置使凌雲翼直指使龔懋賢。案叅政使孫光祖。兵巡使劉倬。兵備使徐汝陽。軍書以其狀請。是時給諫光懋上書。大畧恐平遠府江諸撫民。有如一。日聞風皆四面而起。其何以待之。於是劾守備使黃道。及童子雲等。猶制置使所論說也。童子雲恐大將軍得以兵法從事。輒先期遠逃去矣。是歲萬曆戊寅春也。而大司馬方逢時所劾奏亦如之。上乃以朱甫。張九韶。下御史。

逮問黃道竟坐法免。童子雲及逃兵，令所司逮捕。有詔詔閭閻凡撫民，止許所在縣道，皆附土著治生。它一切不得徵調，以此著爲令。令自是始也。

東山者，東安縣也。萬曆丁丑，羅旁旣平定。上幸用廷臣議，議以東山爲東安，建叅將一人。于時陳璘以副總戎秩到官管事。居五六年，癸未，東山建關王廟，長春寺，璘調營兵三百人，令出金錢二百兩。諸營兵皆大怒曰：「旣能力以作之，奈何復竭饑以奉之乎？」是時春正月，天大風雨，寒甚。諸營兵佐棗鼓，稍緩璘輒撻掠之。諸營兵益積怨，深怒于璘，欲反。顧未有路耳。

頃後營隊兵由白眉峒至。右營隊兵自南山至。並轉  
水東門。飲酒醉。與商民爭權。略米菜。而哨官劉一鸞  
譙讓之。營兵黃玉遂執鸞朴杖。幾死。於是玉畏鸞死  
遂反。先是璘侵獵餼稟。諸營兵不得稟食。縣官二月  
矣。廼於長春墟鳴金鼓。張旗志。立玉爲大總。遂殺我  
兵。潘受鍋二。爨旗鼓。東安令陳公大閉門走城上。撫  
諭之。竟不從。由此諸營兵三百人。引隊兵五十人。與  
俱。所過富祿。渣峒。柵陂。托峒。鹿架。涌石。狗頭。坪峒。大  
寨。殺人人。鹵男婦一十七人。燒營房七所。直走賓祿  
所止壁。於是璘以重賞。賞兵。及番兵。衝鋒一百金。追

亾。斬黃玉等首一百餘級。奪獲陳恩等四十一人。而諸大用等一百餘人。竟遁逃入賊巢。糾合撫徭。犇兵及守備使歐泮所部叛兵。並鼠竄粵西。屯陸川。劫北街。殺五十餘人。虜一百三十三人。璘廼以金錢得贖。頃引兵擊破之。斬首八十四級。是時癸未閏二月也。直指使羅應鶴轉遷視北直文學矣。行至南雄。始接承羅定傳兵使。侯應爵軍書也。當是時。東安亦使使召王秀龍至。直指使乃進秀龍堂上。問狀。秀龍具言東安令。往在城上諭降。諸營兵以書繫鎗。遁城上。今其書在。河按而問也。於是下同知鄭良材。具得其實。

於是直指使上書劾奏璘。虛冒兵餉。歲五千兩。魚鹽歲六千餘兩。而大司馬張學顏乃請比盜沿海軍餉法。詔獄顧第恐臨敵易將。徒令陳璘以得去爲幸。而代者以新任爲辭。於是議以璘戴罪管事。前是僉事侯應爵以四品服。備兵羅定。會嶺西分巡使徐汝翼請假。爵以故移居高肇。視嶺西事。大司馬以爲爵與璘同官。旣不發其貪暴。柰何又從而掩覆乎。兵變旣踰月。陳公大始以檄請皆有狀。請論如法。是時制置使郭應聘亦已到官矣。請偕總戎黃應中提兵往止其罪。上幸可之。於是陳璘坐法免。得立功自贖。

侯應爵。竟以新遷叅議秩貶一等。陳公大罰俸半年。徐汝翼幸除罪。於是事皆由制置使矣。其後頃之。給諫張鼎思及制置使御史鄧鏞亦上書案把總劉宗漢。陳銘。王朝相。哨官陳相。潘麟鳳。李昌。叅將葉歡罪。先是璘等既請治。上乃以劉宗漢等及歐泮。下御史逮問。免葉歡官。速戚繼光到官管事。於是諸將軍提兵往擊。播浪破之。斬首一百九十九級。生得三十三人。奪獲被鹵二十八口。招撫二百餘人。制置使以其狀請下大司馬。於是上賜郭應聘二十金。紵絲二表裏。徐汝翼十五金。葉朝陽。鄭人達。十金。白玉。

等八金。侯應爵。葉歡復其官如故。其後甲申。大同馬以制置使請。念陳璘在羅旁久勞苦。至所劾虛冒五千。無驗。所受禮節金一百九十餘兩。魚米多索價五百七十餘兩。皆追給歸帑。於是以多斬叛兵。亦除罪。上從之。詔以故職管事如初。

讚曰

軍憾曰。世世作姦。侵盜縣官。是謂國姦。信哉是言也。余觀羅定東山事。難發主將。延引猖浪。互相稱亂。甚乎哉。幾危疆場。西寧界在七山六十三山之間。假令皆如諸叛兵。則其禍亂可勝道哉。軍無財。士不來。軍

無賞。士不往。宜其攘臂而去也。



王三唐景松列傳

王三者澄邁流賊也。縣故在瓊西去郡可六十里。輕騎一日中蚤自至也。有靖山宋道爲郡咽喉故事。鄉黎諸兵戍守之。黎兵文皇帝有詔復其身。歲時猶稟食縣官。鄉兵亦徵發不及矣。隆慶中。都御史李遷常嚴約束。縣頗利賴之。居亾何。鄉兵議供繇使而黎兵亦復報罷。當是時。東水不礪二營。營兵亦寢乎會丙子秋。颶風傾南門。偷盜酋長王三等八十餘人窺邑中之隙。乘間而入。公帑略公帑金七百八十九兩而去。先是邑令田升未到官管事。丞文鍾以大計

行。於是以尉行縣事。尉鄭朝遇乃與邏卒追亡逐北，傷左手。而三等竟斬西關，略舟入于海。於是總督凌雲、御史詹貞吉、叅劾朝遇。詔使御史逮問。是時備兵海南者，副使許岳、海北者叅議鄭恭岳，以九月初始當官，而恭亦以二司皆從大兵往廉州不及行。頃岳等乘傳到官，而王三等三十二人已獻見得四百七十五而餘矣。以故岳與恭得不論。時萬曆丁丑春也。於是大司馬王崇古議瓊州、平絕海外海外諸酋志未嘗須臾忘瓊也。籍令澄邁、涿溝、高壘、堅壁而守，猶恐一日有如不可知。奈何所將卒得放散牛馬。

皆櫟弓矢而虎睡乎。請復諸黎兵如故約。因下令生  
黎。有願爲兵者。約長先引導謁縣官。縣官以所謂者  
名姓書入版圖。上幸許可。始瓊崖建叅將一人。白  
沙把總一人。而以兵四千戍守之。歲費金四萬。說者  
謂將卒皆安。在王三等一日以八十人。白晝大都之  
中。劫縣帑而奪之金。此罪在士卒。士卒皆曰。吾等小  
人。豈敢鼠耗廩食。徒提桴鼓在軍門。而漫無所事事  
乎。旦暮從將軍供繇使。出入道上。甚至役占納班。虛  
兵扣廩。徃徃有之。然亦不敢道也。

唐景松者。大廟偷長也。常徵數百人。大入英德清遠

諸縣諸縣校長引兵擊破之。生獲唐景松等四十四人。斬首一百有四級。於是以松等繫獄。御史龔懋賢及南贛都御史蒙詔請梟斬軍中。會松等四十餘人。後先填牢戶。皆慘屍以徇。是時殘遺李亞六一人。以二月二十一日。鉗鈇赴市曹。當刑。亞六悲號於三司所。三司施堯臣等疑此囚必冤。乃束而詣廣州理劉朝璽。瓊州理劉孝易。問狀。亞六番禺人。姓劉。名亞長。劉晚節之子也。甲戌夏六月。牧牛朱村嶺。會大廟峒偷長李秀龍至。道逢亞長。執之。養以爲已子。遂冒姓曰李。亞六亞六于時十四歲也。其後戊寅四月。我

師生獲唐景秀等。亞六春秋已十九矣。少失母。孤父。晚節手足不仁。卧牀蓐。旦莫號泣思兒子。兒子亦從峒中思父。父死。生安可知乎。及獲輿膠。亞六對簿。於是逮伍長黃積富。及伯父劉華節。左驗皆請以死。明亞長實不爲盜。有狀。御史嘆曰。冤哉。誣之也。亟請于上。竟得恩貸。是歲萬曆己丑也。亞六復其姓。曰劉亞長。

贊曰

人言精誠所加。金石爲開。果然。李亞長以監童牧牛村落。豈自知入虎穴。卒之四十餘人俱瘦死獄中。長

獨得免。豈可謂非天乎。澄遭請復諸黎兵。大司馬議  
是語曰。文武不備。則良民懼。豈東粵謂哉。

惠潮廣丹俄諸倭列傳

惠州諸倭。其名姓靡得而考也。東粵歲秋末冬初。名爲倭汛。先期制置使。以羽檄飭橫海將軍戒嚴惠州。以同知一人。春冬屯碣石。夏秋屯海豐潮州。以同知一人屯潮陽雷州。以同知一人屯通明廉州。以同知一人屯永安瓊州。以同知一人屯海南廣州。以同知一人屯南頭。獨吳川電白。實濱海。屬高州。高州故無海防乎。於是制置使殷正茂。請以同知掌海防。春夏屯吳川。秋冬屯電白。蓋自萬曆乙亥春始也。前是兵備使李材。叅將侯繼高。以甲子港。魴鯁倭來請。倭僅

以輕艇載四十餘人從東西行會同知周宗武及裨將羅懋辰鏖戰斬首五級奪獲刀槍弓矢皆三十有奇時甲戌十二月初五冬深矣制置使頗心疑之以爲海上諸編氓往往多竊疾專好保姦而其甚者託名爲倭公行海島今必此輩所爲乃下兵巡使當以沈命法法比矣居頃之廣海守備使楊繼武亦以十二日稱倭至銅鼓村倭奴之衆固已六百餘矣其後三竈烏沙環有倭舟一艘艘四十餘人裨將趙宏泰引兵橫石基漸增至四百餘人猶在十五十六日之交乎諸倭奴所至或登陸登陸輒焚舟劫略劫略毆



牛畜不取。取鷺鷥食。食亦不火。與北虜同俗。此必真倭。倭聲欲犯廣海哉。於是總戎張元勲。偏將梁守愚。及嶺西兵。梁守愚。並以軍軍陽江。陽江去廣海近矣。是時裨將季金。請副使趙可懷。馳廣海監察軍。行至境上而守。備林鳳云。倭以十八日。半在海朗所矣。旦日復以二十餘艘。載一千人。屯劄坡頭。欲犯雙魚所。弗能下。是夜夜漏十三刻。諸倭用火器燒城樓。百戶張鈺傷面。貌縊死。倭奴遂入城。城中乘黑夜。皆奔走。以故得逃死。本兵譚綸。案總戎張元勲。偏將梁守愚。及嶺西兵。備使石磬分守。使劉志伯罪。勲等於是待罪行間。殺。

滅賊。本兵以爲倭奴非時入犯。此必有誘之者。恐志不獨在廣。請移吳會閩浙。使伏波將軍旦莫常從兵士。陳兵備海上。前是閩將呼良朋稱綉鞋銅簪倭舟一十餘艘。胡蘆孤嶼。倭舟一十五艘。有狀給事中蔡汝賢上書。大略以爲閩浙海波相接。一衣帶水而下。瞬息千里。而江南財賦之區。孰與閩廣重乎。嘉靖中。倭奴以五十四人橫行江淮。直擣白下。延引歲月。而後始得寧懿也。當時水兵戰而勝者什之九。陸兵戰而勝者什之一。意欲壓倭奴。庶無登陸。乃請制置使移居潮州。於是下本兵議。皆壹意以征伐爲務矣。

項之制置使乃使使者送奉旗牌至兵使者所。卽以羽檄徵肇慶高州惠潮諸營兵。馳陽江前。是從軍征倭者。賞罰未及如初約。軍中口語藉藉。於是兵備使請以新法。大書軍門新法。能斬捕倭酋長者。遷秩三等。欲金。予金一百五十兩。倭從。遷秩一等。欲金。予金五十兩。其以漢人脇從至者。遷秩一等。欲金。予金二十兩。死兵。受爵金。如得倭從。兵備使乃祭旗召諸軍聽誓言。願諸軍幸。倭力不支。欺也。是日新民許恩。李茂前請曰。願滅倭而後朝食。恩卽提兵馳戢。舡海。自二十三至二十五。連戰三晝夜。金鼓不絕。倭乃敗。得

生倭三十四人。斬首二級。奪被虜男婦二十八人。焚倭艇二艘。餘黨皆奔走。我追亡逐北。至七星港。斬首一十六級。奪獲被虜三人。復追亡至抱虎海。倭奴皆棄舟。欲行陸。茂挑戰。獲生口二人。斬首二級。乃視諸軍先登矣。俄副使李多祚馳南頭。僉事何子明馳新會。軍書一日十餘發。發南韶。徵章程兵。發恩平陽春。徵烏銃手及浙兵。兵未至時。石磬以爲今乘其未出水陸皆設兵衛。使倭不得度港。旦莫保孤城。進不得攻。退不能守。此坐而困之之策。亡何倭放出寨中。裝治攻城具。買馬欲遽逃。走高雷。已度歲莫。僉卒難出。

城乃毀人屋居。補治傾城。日夜煮酒。欲爲除夕之歡。守備趙一夔具以實。陳于磬。磬大喜。以爲倭幸中吾計。不出城。城外從太平出河村。運爲東道。從儒峒出上陽爲西道。從樂安出運口。爲東南道。獨石門海港。則水道。我乃以輕銳之卒。捕伏間道。出倭奴不意。然後引三道兵衝城。倭益不敢出。旋自滅亡矣。久之。倭覺。乃以五百人詣儒峒。儒峒西走高雷道也。於是張元勲提兵四面至。會莫休止壁。俟旦日日出戰。倭已大半悉度河矣。我兵以百子銳擊倭。倭大敗。斬首捕虜百餘級。是日兵備使引裨將楊桂等自平江屯起。

兵至儒峒。城頭鐘鳴漏盡矣。乃伏河上。待諸倭。明日倭果出巢。阻河爲固。於是伏兵從道左。俟卒起。疾方戰。戰數十合。擊破諸倭奴。斬首捕虜五百有九級。奪被虜二十八人。我兵亡葛文光等五人。傷把總葛子明。兵孫文等一百二十三人。於是被鹵梁圖用前曰。吾等賴諸將卒力。幸得脫虎口。今諸倭鼠竄入山林者。猶有頃。諸將楊桂。卽自紅花逕。追逐至楊春施村。轉戰斬首一百有八級。奪獲馬四蹄。我兵亡一人。傷四十九人。徐天麟追亡。至白宿逕口。斬首二十餘級。鄭大任追亡。至官松寨。斬首二十八級。獲生口一人。

電白令王許之。獲生口四人。時閏十二月初九也。把總葛子明死。於是兵備使請以百金治柩。柩總戎以下。皆歸賄歸賻如禮。自是之後。副使陳復升。及叅將晏繼芳。把總金鳴亮。專以䟽捕殘倭爲務。請數自初五至二十七日。斬首捕虜凡八百一十三級。於是殷正茂張元勲爲元功。賜正茂金三十兩。紵絲二表裏。廕一子入國學。賜元勲陞都督同知。金二十兩。紵絲二表裏。石磐賜遷秩一等。金十五兩。趙可懷劉志伊。賜遷秩一等。梁守愚。賜復故爵。金十兩。徐天麟等。許恩等。賜八兩。何子明等。周宗武等。賜五兩。其餘宗武。

制置使復請以運同秩視惠州事。是時守令得並倂叙者。肇慶知府楊棐。瓊州知府郭夢得。肇慶通判劉元相。朱彬。陽江知縣陳嘉謨。電白知縣王許之而已。汎期。浙直福建。以三四月爲大汎。九十月爲小汎。而粵東故在秋末冬初。前此未有以十二月入犯者。以十二月入犯者。其辛未神電之役乎。雙魚而後丙子。復以正月十二入亞公山。十三入三洲。鯉魚塘。以二月二十四入赤勘汊口。二十九入白峙口。異哉。非復曩時所聞也。於是本兵請以大汎必至五月。小汎必至十一月。解嚴。然事又安可知乎。曩者余聞之。諸倭



奴皆從日本國。楊楊鼓棹而來也。

丹俄者。日本薩子馬國人也。戊寅夏四月。以三百人鼓行至浙南兜山。會大風。湛船。諸倭遂解散。殘遺四十人。乃略海上諸漁舟。復乘汛走閩閩。故多白舟。俄等復略白舟。走廣大鵬洋。於是叅將胡震提兵一百餘人。追逐倭。倭棄艚舟。乃操一輕艇。有走西涌。我師追亡至九洲洋。倭復棄輕艇。登黃楊山。阻深林以爲險。裨將王文偉。湯貴等斬首五級。震及把總徐成。蒼頭軍胡環。斬首三級。生獲丹俄等二十三人。奪被虜陳述芳等八人器械一十有奇。艚舟一艘。戲厥殆盡。

矣。始卅俄爲酋長。用新老一人曰子紀。總管一人曰  
梵子紀。柁工一人曰神祿鼓。火長一人曰隴仔。大總  
一人曰係欽表。號令頗端肅。每坐坐卅俄上坐。分新  
老總管五人左右。其它盡皆列兩旁。兩旁諸酋曰仁  
哉曰良哉曰見腦曰四假花子曰楊二老曰帥加六  
曰丘龍滄曰失指囉曰屠馬當俄腦曰通曰腦曰俄  
龍表曰哮三不羅曰交哪曰姚四友其法凜如也。嗟  
而海島之人喋喋而咕咕嚴固何當乎。

惠潮諸倭亦不知其姓名也。先是漳州人誘至烽火  
寨。倭不過一大舟。舟載一百五十人來矣。其後入臺

山奪漁舟六艘。艘稱七十有奇。聲欲聚彭湖。何至是耶。居亾何。傅惠潮者。副使張堯年。傅廣州者。僉事張友舜。及總戎侯繼高。請于巡按御史海淳。于時蓮花鎮實倭舟一艘。多不至六七十人。俄入福永。會新安知縣范經引把總李一龍兵搏戰。斬首二級。獲生日二人。奪被虜四人。時庚辰三月也。其後四月。倭奴復以一舟載六十餘人。入拖虎港。把總李元機疾力戰。斬獲首級及奪鳥銃倭刀諸器械。俄復自放鷄山。往來吳川海。皆有狀。於是守巡使王來賓。舒大猷。徐時可。具以實告。巡按御史乃上書請防瓊雷及惠潮諸

郡大略以爲日本比年枯旱。年穀不登。度倭奴非出劫。此必無以爲生。幸而飄散。卒難聚首。有如一日汛便輻輳而至。海上其何以禦之。而况瓊雷風汛必夏至以後。始還故國。今海島群聚不逞之徒。保納舍藏。比比而是。曷可勝誅哉。

廣州諸倭。此以南風汛至也。歲甲申。常以百餘人操舟而來。自日本國道遠。徒志在金帛。不自知干戈旦莫在頸哉。於是兵巡使陸萬鍾。使裨將王權。備南頭寨。許大用。備碣石寨。屬海防使朱一栢。鄭天佐。掌之。麾蓋所臨。諸倭酋乃指日可就禽矣。頃之。諸倭酋猶

公行海上。橫海將軍皆大怒。髮至上指冠曰。倭奴敢如是。是日陳兵疾力戰。斬首捕虜凡五十四級。奪獲被虜一十七人。我兵亡一人。傷三十二人。於是制置使吳文華及巡按御史汪言。乃先以金錢給諸死傷者。然後論功。請行賞。倭功令甲。諸賊不過百餘人。舟不過三艘者。爲第三等。能斬捕真倭從一級。賜千金。漢人脇從賊一級。賜五金。皆無封爵。自是之後。本兵張佳胤案巡按御史議。首總督臣吳文華。而副使臣陸萬鍾次之。叅將臣方伯。遊擊臣洪慶禔。又次之。同知臣朱一栢。臣鄭天佐。知縣臣陳汝鳳。臣梁太皞。

把總臣許大用。指揮臣王權。名色把總臣夏大恩。臣王漢。又次之。上幸從本兵請。賜吳文華金二斗。兩紵絲二表裏。陸萬鍾十金。方伯等八金。朱一栢等五金。於是海不揚波。陛下其聖神矣夫。

讚曰

孔子曰。夷狄之有君。不如諸夏之亡也。不其然與。丹俄當流離中。與新老等。猶若有左右上下之體。仰何雍容爾雅也。至其犯中華。略海島。殆與鳥鈔求飽何異。春秋言夷德無厭。豈近是乎。雙魚之役。非以汎入說者。以爲非倭。及得報。爲不火食。倭矣。豈非雕題交